

**TRUTH
CENTERED
TRANSFORMATION**

MODULE 1



**ISINGENISO KUNKONZO
EPHELELEYO
UGWALO LOMBALISI**

Inguquko egxile eqinisweni –Ugwalo lwezifundo1: Isingeniso kunkozo ephelileyo Copyright
©2019 Reconciled World, Phoenix, Arizona, United States of America. www.reconciledworld.org

Lumsebenzi wenziwe ngokomthetho weCreative Commons Attribution-ShareAlike 3.0 license. Uvunyelwe njalo uyakhuthazwa ukuwuguqula, ukuwukopa, ukuwupha, lokuwusabalalisa ulandela imigoqo elandelayo:

Ukucaphuna -- Kumele utshengise ukuthi ucaphunile kulumsebenzi ngokufaka okulandelayo uma uthe wawusebenzisa: Copyright © 2012. Published by the Reconciled World (www.reconciledworld.org) Phansi kwemigoqo yeCommons Attribution-ShareAlike 3.0 license. Uma ufuna ukufunda lokhu ngobubanzi ungafika ku www.creativecommons.org.

Lumsebenzi Awuthengiswa – akumelanga usebenzise lumsebenzi ukuthi uzuze imali.



Uma ufisa yinxenye yalaba abatolika lumsebenzi ungaya ebulenjini ku info@tctprogram.org.
Yonke imibhalo esetshenziswe lapha ithethwe eBhayibhilini Elingcwele, ele New International Version®, NIV®. Copyright ©1973, 1978, 1984, 2011 by Biblica, Inc.TM Used by permission of Zondervan. All rights reserved worldwide. www.zondervan.com I“NIV” le“New International Version” ngama trade mark avunyelweyo kwele United States Patent leTrademark Office eyeBiblica, Inc.TM.

Amazwi okubonga

Zincane izibongo zethu kulabo abasincedisayo ukuze uhlelo lwethu luthuthuke. Ukutshiseka kokuthi umsebenzi lo wenziwe kwadabuka emfundisweni kaMnu. Darrow Miller owe Disciple Nations Alliance lo Bob Moffitt owe Harvest Foundation. Uhlelo lolu lukhule ngeminyaka ngisebenza le Food for the Hungry. Ngilokubonga kibo ngoba banginika ithuba lokuthi ngihlele leminakano lokunginika inhlawulo yokwenza lumsebenzi uphumelele.

Egwalweni lwezifundo lokuqala, ngigxile kakhulu emfundisweni kaBob Lo Darrow. Ikakhulu emfundisweni zabo ezikhuluma nge “Development ethic” eka Darrow Miller lekhuluma nge *“leadership development training program”* eka Bob moffitt. Eminye imbono yokuhlela lezi mfundiso ivele kuMark Wilson. Indatshana yokucapha umfula ekusifundo sasitshiya galombili ayilotshwanga yimi, isetshenziswe endaweni kodwa angizange ngathola ukuthi ngubani owasilobayo. Ngiyabonga kakhulu kulabo engenelise ukusebenza labo eminyakeni edluleyo, befunda njalo besebenzisa imibono le. Bangamaqhawe oqobo. Yikusebenzisa kwabo ulwazi abaluzuze kulimbono lempumela yabo enze lumsebenzi waphumelela. Yikungikhuthaza kwabo okwenze ngaqhubekela phambili lapho ngilahlekelwa lithemba. Ngibonga kakhulu iqembu lokuqala elangibekezelelayo ngisafunda ukufundisa ngingakabi kwazi lokuthi ngiyafundisani. Lazama ukuzwisisa lokufundisa imbono eyacina ibonakele ukuthi iphezu kwezinga lalo. Njalo kunguNkulunkulu osuse lezizigaba ekudubekeni, okuyisikhumbuzo sokuthi bekungekho ngami loba lokhu engikwenzayo kodwa kunguNkulunkulu lalokho yena akwenzayo. Kungithinta kakhulu ukuthi uNkulunkulu ungivumele ukuthi ngibe yingxenye yendatshana le, wangisebenzisa loba nje ngilokwehluleka kwami. Udumo malube kuye yedwa.

Okokucina, ngithanda ukubonga umkami owanikela umsebenzi wakhe weza ukuzosebenza lami kuloluhlelo. Engekho ngabe konke lokhu akuzange kwaphumelela. Ngiyazi zinengi izinto owazinikelayo eminyakeni edluleyo ukuze lokhu kwenzakale. Ungumoya ongaphansi kwamaphiko ami, njalo ngiyakuthanda.

Anna Ho

Umnqophisi oPhetheko

Ungakaqalisi

Ukulungiselela ukwethula isifundo

1. Bala uzwisise **Ugwalo Lwababalisi**, uma kudingeka ukuthi uyiphindaphinde yenza kanjalo. Khanyisa loba ulobe imicijo emqoka eceleni kwephepha ukuze uyikhumbule uma usufundisa.
2. Khangelisisa **Imiqondo emqoka** sinnye ngasinye ukuze wazi ukuthi abafundi bamele bafundeni kuleso sifundo.
3. Bala **Imibhalo** ezasetshenziswa esifundweni isifundo singakaqalisi.
4. Bona ukuthi yiphi **impahla yokusebenzisa** oyidingayo kulesi sifundo, ubone ukuthi uyadinga lezo ndingakalo lempahlakuphathisa ezizasetshenziswa kuleso sifundo.
5. Bona ukuthi **imisebenzi yokwenza** yonke emele yenziwe esifundweni uyayazi (imidlalo lempahlakuphathisa). Ungazama ukukwenza labangane loba lemuli yakho ungakayenzi phambi kwezifundi.
6. Thatha isikhathi **uthandaze**, ukuze uNkulunkulu avule indlebe zezifundi ukuthi zizwe lokho uNkulunkulu afuna zikuzwe njalo akusize ukuthi ufundise kuhle. Khumbula ukuthi kungamandla kaNkulunkulu ukuze sibone abantu beguquka.

Okungakunceda ekufundiseni

1. Fika masinyane ulungise ozafundisa ngakho lendawo ozabe ufundisela kiyo.
2. Ungafundisi ugijima. Phana isikhathi esaneleyo sokuxoxa ngesifundo, esemisebenzi lesamakhefu. Lokhu kwenzelwa ukuthi izifundi zibesikhathi sokuzwisisa lokhuthi ziphathise esifundweni. Qhuba ngesiqubu izifundi ezizwisisa ngaso. Bona ukuthi zonke izifundi zizwisile. Ezinye imfundiso zingathatha isikhathi eside esingaba lilanga lonke lengxenywe kusiyafika kunsuku ezimbili.
3. Hlala uhlola njalonjalo. Ekuqaleni kwesifundo hlola ukuthi izifundi sezifundeni emfundisweni lezi. Ukuphindaphinda kwenza abantu behlale bekhumbula abakufundileyo.
4. Landela ugwalo lwababalisisi lamanothi akho owalungisileyo.
5. Kumele ulandele inyathelo ezine sifundo sinnye ngasinye.
 - a. Ngenisa inhloko yendaba – imisebenzi izabambanisa inhloko yendaba lalokho asebedlule kikho.
 - b. Nika ulwazi olutsha – kule ndlela ezinengi zokwabela ulwazi olutsha.
 - c. Nika izifundi umsebenzi ngalokho esezikufundile – imisebenzi yenza izifundi zizwisise ngcono lokho ezikufundileyo ngokusebenza labanye, ukudala into ezintsha; ukusebenzisa ulwazi olutsha loba ngayiphi indlela.
 - d. Bambanisa izifundo lempilo yazo yansukuzonke – leli linyathelo lokusebenzisa isifundo, linyathelo elincedisa izifundi ukuthi zikhethe ukuthi isifundo ezisifundileyo singasebenza njani empilweni zazo. Ukufunda ungasebenzisi ulwazi olutholayo empilweni akubisi nguquko njalo akuqakathekanga kangako.
6. Buyelela ulwazi lwakho lokufundisa abantu abadala lezinye imfundiso owazifunda kuhlelo lokufundisa abafundisayo olweFacilitator Development training.
 - a. Phana iziqondiso ezizwisisekayo.
 - b. Buza imibuzo eminengi.
 - c. Bonga izifundi ngokuphathisa kwazo ezifundweni.
 - d. Ungazisi izifundi ukuthi zizafundani kungcono zizicengele ulwazi.
 - e. Qala izifundo zakho phezu kwezinto izifundi ezizaziyo, nanzelela ulwazi lwazo.
 - f. Bekezela ulindele izifundi ziphendule.

7. Kuthaza wonke umuntu ukuthi aphathise njalo abelane labanye uma izifundo zisaqhuba. Dinga indlela yokwenza abalehloni baphathise labo ungazange wabayangisa.
8. Khuleka kuNkulunkulu ukuthi alambulele izinto ezitsha wena lezifundi zakho.

Ukusetshenziswa kogwalo lwababalisi

1. **Imiqondo emqoka lempahla yokusebenzisa:** Isifundo sinye ngasinye siqala ngalesi sigaba.
 - a. **Imiqondo emqoka** – le yimiqondo eqakatheke kakhulu emele izwisiswe ngabafundi ekupheleni kwesifundo sinye ngasinye. Uma isifundo sesiphelile thatha isikhathi uphindele emuva uqiniseke ukuthi izifundi zizwisisile imiqondo le.
 - b. **Impahla Yokusebenzisa** - Impahla okumele isetshenziswe ibhaliwe kusifundo sinye ngasinye.
 - i. **INSIZA EBONWA NGAMEHLO** – ziyabe zibhalwe ngale indlela. Kumele ziprintwe ilanga lesifundo lingakafiki.
 - ii. Sikhuthaza ukuthi umbalisi abe lomduli wokubhalela, iphepha elikhulu elokubhalela elokusebenzisa uma eleqembu elikhulu.
 - iii. Ugwalo Lwezifundi uyakhetha uma ufuna ukulusebenzisa. Loba yiphi ingxenye elamakhasi ahambelana lasegwalweni lwezifundi ayabe elotshwe kanje egwalweni lwababalisi: (SG).
2. **Iziqondiso Zoqondiso:** Kuleziqondiso eziqakathekileyo esifundweni ezikuncedisa ukuthi wethule izifundo zakho ngendlela efaneleyo. Lezi akumelanga uzabele izifundi. Funda lezi ziqondiso ulungiselela ukuhola ingxoxo lemisebenzi yokwenza. Eminye imibuzo izakube ilempendulo ezibhalwe ngamatalika ukuze zikuncedise njengomqondisi ukuze wazi impendulo omele uzikhangelele kuzifundi. Akutsho ukuthi yizo zodwa impendulo ezilungileyo, yingxenye yezimpendulo ezingabe zilungile.
3. **Ukusetshenziswa kwesikhathi lokuqhuba kwesifundo:** akula mgoqo wesikhathi ofakiweyo owokuqhuba kwesifundo sinye ngasinye.
 - a. Thatha isikhathi esidingakalayo ukuze usize izifundi zifunde imbono emitsha esezifundweni lezi. Kuqakathekile ukuzidla ngokuthi izifundo ziyabambeka na ezifundini kulokuqeda isifundo ngesikhathi esibekiweyo.
 - b. Khumbula ukutshiyela abaqondisi isikhathi sokuthi baqale ngokuzinikela emthandazweni, banikeze ubufakazi, baxoxe ngobunzima abalabo uma belabo likhuleleke ndawonye.

Isifundo sakuqala: Indaba yonke

Umqondo Omqoka

Ukubona abantu besindiswa akusiyona yodwa injongo kaNkulunkulu kodwa lokubona ukubuyiselwa kobudlelwano obuthathu obephukayo ngesikhathi sokuwa komuntu—ubudlelwano bethu loNkulunkulu, ubudlelwano bethu labanye lobudlelwano bethu lezinye izidalwa.

Impahla Yokusebenzisa

1. Insiza ebonwa ngamehlo:
 - a. Ubudlelwano obuthathu (Imifanekiso emine: Ukudalwa, Ukuwa, Isiphambano, Ukubuyela)
 - b. Umdlalo kaAdam loEva (wenze ingwalo ezimbili)

Isingeniso

INGXOXO YEQEMBU ELIKHULU

- UJesu wafelani?

Iziqondiso Zoqondisayo: Kuthaza kube lempendulo ezinengi. Khumbuza izifundi ukuthi akusimpendulo eyodwa nje eqondileyo. Amukela zonke impendulo eziqondileyo.

Sivame ukuthi uJesu weza ukuzosisindisa ezonweni zethu. Lokhu kuliqiniso, kodwa weza ukuzokwenza okunengi okudlula lokho. Ukufa kwakhe esiphambanweni yingxenye eyodwa eyendaba yonke. Ukuze sizwise umbiko weBhayibhili kumele sizwisisse indaba yonke kusukela ekuqaliseni siyofika emaphethelweni.

Ukudalwa

INGXOXO YEQEMBU ELIKHULU

Ugxile kulokho ovele ukwazi ngokudalwa komhlaba nguNkulunkulu, ungayiphendula usithini imibuzo le elandelayo?

- Babunjani ubudlelwano buka Nkulunkulu loAdamu? (*UGenesise 1: 26-27, 31*)
- Babunjani ubudlelwano buka Adamu lo Eva? Ubona angathi babetshona bephikisana? (*UGenesise 2:23-25*)
- Babunjani ubudlelwano phakathi kuka Adamu lezidalwa? UAdamu wayelakho konke ayekudinga na? Wayelokudla okwaneleyo na? (*UGenesise. 1:29-30*)

Iziqondiso Zoqondisayo: Tshengisa **INSIZA EBONWA NGAMEHLO** Umfanekiso 1: Ukudalwa ube usuncedisa izifundi ukuthi zibone ukuthi ekuqaleni kungabi lokuwa ubudlelwano lobu bobuthathu babungela sisi.

Ukuwa

Bala uGenesise 3:1-20.

UMDLALO

Iziqondiso Zoqondisayo: Cela abantu ababili ukuthi benze umdlalo lo olandelayo. Nikeza laba abazinikeleyo ababili umdlalo.

“Ingxoxo phakathi kukaAdamu lo Eva”

Adamu:	(Belima esivandeni) Eva, ukusebenza esivandeni eqinisweni kusuke kwabanzima ngemva kokuba sicaphule uNkulunkulu ngokudla isithelo lesiya!
Eva:	Yebo, labafana bethu abasazwanani labo. Batshona bephikisana betshayana isikhathi sonke. Ngithemba akusoze kudlulise amalawulo! Lalawa mahlamvu okumele ngiwagqoku. Mabi kakhulu!
Adamu:	(Esephikisa) Kahle, asenelisi ukuthenga izigqoko ezitsha ngakho ungakhononi! (Ame kancane) Ngikhumbula kudala, uNkulunkulu, esahamba lathi njalo ekhuluma lathi. Ngathesi uyazisola langokuba kwethu lapha. Khumbula njalo ukuthi izinyamazana zazisilalela njani? Kathesi ziyasibalekela ngokusesaba!
Eva:	Yebo, kumbe ziyazama ukusiluma! A...Ngiyazizonda inyoka! Ngiyamangala ukuthi ngavuma ukuxwayiswa yinyoka! Wonke amanyala la abangelwa yinyoka!
Adamu:	Hatshi, Konke kwabangelwa nguwe! Awuzake wenza okulungileyo! Kungani kumele ngixwayiswe ngumuntu owalalela lapho exwayiswa yinyoka?
Eva:	Kahle, ungaze wanginikeza icala. Kwabangelwa nguwe! (Esima, esedanile) Ngiyaxolisa. Akuncedi ukumemeza. Adamu ubona angathi kuzezenzeka izinto zibuyele zibe yilokhu ezaziyikho khona kudala?
Adamu:	Angazi. UNkulunkulu nguye yedwa ongalungisa amanyala la!
Eva:	Hayibo—sokwenzenjani kathesi? (Ememeza, egijima) Yekelani ukulwa lina bafana lobabili! Yekelani kathesi so. Liyangizwa? Ngizamtshele uyihlo, akusoze kumthokozise lokhu!
Adamu:	(Ebuyela esivandeni, esehlisa iphika) Umsebenzi, umsebenzi, umsebenzi, umsebenzi umsebenzi, umsebenzi ...

INGXOXO YEQEMBU ELIKHULU

Ngokusemdlalweni lalokhu okubalileyo eBhayibhili, yiziphi ezinye inking esesihlangana lazo ezabangelwa yikuwa?

- Bala uGenesis 3:8, 10 – Yikuyini okwenzakalayo ebudlelwaneni babantu loNkulunkulu ngesikhathi sokuwa?
- Bala uGenesis 3:12 – Yikuyini okwenzakalayo ebudlelwaneni babantu omunye lomunye ngesikhathi sokuwa?
- Bala uGenesis 3:15 – Yikuyini okwenzakalayo ebudlelwaneni babantu lezinye izidalwa ngesikhathi sokuwa?

Ngesikhathi sokuwa, ububi bangena emhlabeni; hatshi ububi esimeni sabantu kodwa ububi benyama njalo. Kungakabi lokuwa kwakulokudla okwaneleyo njalo kwakungela kuzamazama komhlaba, kungela zikhukhula, kungela ndlala. Kodwa ngenxa yokuwa, sesilakho konke lokhu.

Ukuwa kwalimaza ubudlelwano bonke bobuthathu.

Iziqondiso Zoqondiso: Tshengisa **INSIZA EBONWA NGAMEHLO** umfanekiso wesibili: Ukuwa ube usuncedisa izifundi ukuthi zibone ukuthi ukuwa kwalimaza ubudlelwano bunye ngabunye.

Injongo

Isigaba esilandelayo esendaba kaNkulunkulu lezidalwa zakhe itholakala endatshaneni yokuwa lasemaphethelweni eThestamente elidala.

Iziqondiso Zoqondiso: *Tshengisa izifundi ingxenye enkulu okhuluma ngayo eseBhayibhlini.*

Lesi yisigaba lapho uNkulunkulu adinga abantu bakhe. Ulesifiso sokubuyisa lokho okwephukayo.

U-ABRAHAMA – Bala UGenesise 12:1-3. Kulesi sigaba uNkulunkulu uvusa uAbrahama njalo ambusise. Kungani ebusisa uAbrahama? (*UNkulunkulu ufuna ukubusisa izizwe.*) Kule indatshana sibona uhlelo lukaNkulunkulu lokusindisa umhlaba wonke. Ngokudlulela ebandleni, ufisa ukuletha isibusiso ezizweni.

UMOSE – UNkulunkulu wanikeza umhlaba imilayo elitshumi ukuze sazi indlela okumele sibuyise ngayo ubudlelwano obephukileyo.

- Umlayo ugoqela izinto zikamoya kuphela, kumbe ugoqela ubudlelwano bethu labanye kanye lemvelo?

Imilayo emine eyakuqala ibuyisela ubudlelwano bethu loNkulunkulu. Eminye leyi eyisithupha eyokucina ibuyisa buphi ubudlelwano? (*ubudlelwano bethu labanye abantu*). Umlayo wonke ugoqela ubudlelwano bethu loNkulunkulu (Eksodasi 21:3), ubudlelwano bethu omunye lomunye (isb. Eksodasi 21:12), kanye lobudlelwano bethu lezidalwa? (Eksodasi 23:10-12). Kulemithetho ethile encedisa abantu ukuthi bahlale belempilakahle. (isb. ULevi 13) leminyane etshengisa indlela okumele siphathane ngayo (isb. Eksodasi 23:1-9). UNkulunkulu kazikhathazi ngezinto zikamoya kuphela nje. Uyazikhathaza ngenxa zonke ezempilo zethu. Yikho wadala imilayo kundawo yonke eyephulwa yisono.

Bala UDutheronomi 28:1-14.

- UNkulunkulu uthi kuzabalempumela bani uma abantu bakhe bengalalela imilayo le?
- Izibusiso uNkulunkulu azethembisayo ngezezinto zikamoya, kumbe yizibusiso zempilo yabo yenyama futhi?

UNkulunkulu wavusa amakhosi, labaprofethi, kodwa kunjalo u-Israyeli wahlupheka ebuyangeni lasempini ngoba basebefulathele uNkulunkulu njalo bengasalandeli imilayo yakhe.

Bala 2 ImiLando7:14.

- UNkulunkulu ubiza bani ukuthi azehlise athandaze? (*Hatshi abantu bonke, kodwa bonke abantu bakhe—namhlanje esibathi ngamaKristu.*)
- UNkulunkulu wathi kuzezakalani uma belalela? (*UNkulunkulu uzaphephisa ilizwe lethu*) Lokhu kuseseliqiniso lanamuhla. Akutsho ukuthi sizabona impilo zisindiswa kuphela. Kodwa ivesi le isitshela ukuthi uNkulunkulu uzaletsa ukuphila ebudlelwaneni bonke bobuthathu – ubudlelwano bethu loNkulunkulu, omunye lomunye, njalo lezidalwa.

Isiphambano`

Le akusinxenye emnandi kakhulu kuphela kulendatshana, kodwa yiyo eqakatheke kakhulu njalo. Enkolweni ezinengi, abantu bakhuthazwa ukuthi benze imihlatshelo ukuze bathokozise izithixo, esiKristwini uNkulunkulu wathanda abantu waze wathumela indodana yakhe ukuthi izosifela.

Bala KwabaseKolose 1:19-20. Kungani uJesu wafa?

- UKuze abuyise ubudlelwano bonke.

Iziqondiso Zoqondisayo: Tshengisa **INSIZA EBONWA NGAMEHLO** Umfanekiso wesithathu: Imvuselelo ube usuchasisela izifundi ukuthi uJesu weza ukuzobuyisa konke okwephukayo ngesikhathi sokuwa. Loba kunjalo, konke akusoze kuphelele indaba ize iyo phela.

UJesu wasitshiyela Umsebenzi Omkhulu. Kufanele singaboni abantu besiba ngamaKristu kuphela kodwa kumele seluse izizwe. Ukwelusa izizwe kutsho ukuncedisa izizwe ukuthi silandele injongo kaNkulunkulu endaweni zonke lapho uJesu abuya ukuzobuyisa.

Ukubuyela

INGXOXO YEQEMBU ELIKHULU

Bala Isambulo 21:1-7.

- Emaphethelweni, ubudlelwano babantu loNkulunkulu buzakuba njani?
- Ubudlelwano babantu omunye lomunye buzakuba njani?
- Ubudlelwano babantu lemvelo buzakuba njani? Siyabe silokudla okwaneleyo okokudla na? Kuyabe kusenzeka ukuthi sigule na?

Iziqondiso Zoqondisayo: Tshengisa **INSIZA EBONWA NGAMEHLO** Umfanekiso wesine: Ukubuyela ube usuncedisa izifundi ukuthi zichasise lokhu, ukuthi uJesu engabuya, bonke ubudlelwano bethu buyabe sebubuyiselwe baphelela baba esimeni uNkulunkulu ayejonge ukuthi bube kuso ekuqaleni.

Isiphetho

Le yiyo indaba yonke— indaba enhle kusukela ekuqaleni kusiya emaphethelweni endlela uNkulunkulu adala ngayo umhlabo opheleleyo; indlela isono esangena ngayo kulomhlaba sephula ubudlelwano bethu loNkulunkulu, komunye lomunye, lemvelo; indlela uNkulunkulu asithanda ngayo kakhulu waze wathumela indodana yakhe ukuthi izobuyisa ubudlelwano bonke obephuka ngesikhathi sokuwa; njalo lendlela uNkulunkulu azabuya ngayo ngelinye ilanga ezokwenza zonke izinto zibe zitsha.

UNkulunkulu uyakuthanda kakhulu. Wathumela indodana yakhe ukuthi ife ukuze ube lobudlelwano laye njalo ube lobudlelwano obuhle labanye abantu kanye lezidalwa.

Isifundo Sesibili: Abantu Baqakathekile KuNkulunkulu

Umqondo Omqoka

Abantu bonke benziwa ngomfanekiso kaNkulunkulu njalo baqakathekile kuye. Kumele siphathe wonke umuntu, okugqela labo abavame ukungaphathwa kuhle, njenge ndalo enhle ekaNkulunkulu.

Impahla Yokusebenzisa

1. Ungakhetha ukusebenzisa Ugwalo Lwezifundi (SG)
 - a. Imibuzo ngokudalwa ngomfanekiso kaNkulunkulu

Isingeniso

INGXOXO YEQEMBU ELIKHULU

ECongo, amabandla amanengi aqala ukufinyelela izifebe, ezivumela ukuthi zihlale ezakhiweni zamabandla njalo ezifundisa ukuthunga. Izifebe lezi kwakungamankazana ayehlala ezitaladeni ngoba eyabe ezithwale engakendi, ngakho imuli zazo ziyabe zazixotsha.

- Ubona angathi leli yiqembu elifanele lisizwe libandla?
- Kungaba labanye abantu obona angathi amabandla kumele aqale ngokukhangela bona?

Wenziwe ngomfanekiso kaNkulunkulu

INGXOXO YEQEMBU ELIKHULU KUMBE ELINCANE (SG)

Bala UGenesisi 1:26-27.

- Abantu behlukene njani lezinye izidalwa? UNkulunkulu wasebenzisani edala abantu?
- Yiziphi izimo zikaNkulunkulu ezingatholakala ebantwini? Qamba ezinengi ozenelisayo.

Bala Amahubo 139:13-16.

- Ivesi le isitshelani ngokuqakatheka kwabantu?
- Ubona angathi ivesi itsho abanye abantu kumbe itsho bonke abantu?

UNkulunkulu wasenza, senziwa ngokunanzelela, njalo uzilobile zonke insuku zempilo zethu encwadini. Asizange saphongu kwenzeka nje, kodwa uNkulunkulu wenza umuntu munye ngamunye.

INGXOXO YEQEMBU ELIKHULU

Bala UJohane 3:16.

- UNkulunkulu wenzani ukuthi avuselele umhlaba?
- UNkulunkulu wasifela ngoba sasilungile na? (*Uma bengela qiniso, khangelani kwabaseRoma 5:8.*)
- Uma uNkulunkulu wazimisela ukuthuma indodana yakhe ukuthi izofela abantu, abantu ubabona beqakatheke kangani?
- Lokhu kutshoni kundlela esiphatha ngayo abantu?

Finyeza: Kulamavesi, siyakubona ukuthi uNkulunkulu ucabanga ukuthi abantu baqakathekile kakhulu. Wasenza ngomfanekiso wakhe— omunye lomunye wethu ngokunanzelela wadala wathungwa esiswini sikanina. Ulesineke kakhulu ngabantu waze wathumela indodana yakhe ukuthi izosifela.

Cabanga njalo ngamabandla ayencedisa izifebe.

- Imiqondo le ingasancedisa na ukuthi sizwisise ukuthi kungani bakhetha ukubancedisa?

UKUZIHLOLA

Umuntu munye ngamunye uqakathekile kuNkulunkulu. Kunjalo kumuntu wonke osesigabeni sethu. Thatha isikhathi ucabange uthule ukuthi abantu besigabeni sakho ubaphatha angathi baligugu kuNkulunkulu na .

Ucwaningo Lwesigameko: Ibandla lakuqala

INGXOXO YEQEMBU ELIKHULU

Abazalwane bebandla lakuqala bazwisisa ukuthi abantu baqakathekile. Ngaleso sikhathi, abantu abanengi babekholwa ukuthi othixo babesilwa ukuze kube lobusayo ngakho abantu kwakumele benze imihlatshelo ukuze bazivikele ekujezisweni yizithixo. AmaKristu akuzwisisa ukuthi ukuthi uNkulunkulu weqiniso wayehlukile. Kulokuthi kwenziwe imihlatshelo, wenzela abantu umhlatshelo, ngokuthuma indodana yakhe ethandekayo ezelwe yodwa ukuthi izobafela (UJohane 3:16). Umhlatshelo kaNkulunkulu watshengisa ukuthi umuntu wonke uqakathekile njalo uligugu. Lokhu kuzwisisa uthando lwakhe olukhulu kangaka ayelalo ngomhlaba wakhe, labantu kwenza abantu bebandla lakuqala baphikisane lezenzo ezazivamile ezifana lokukhitshwa kwezisu lokubulawa kwabantwana abancane. Ngaleso sikhathi, kwakusithi uma kuzelwe umntwana oyinkazana, wayevame ukulahlelwa esitaladeni. Kodwa, amaKristu azwisisa ukuthi impiloyonke – ogogekileyo, ongakazalwa, indoda, umfazi, isigqili kumbe isinothi – yayiqakathekile kakhulu kuNkulunkulu. Basebe siza abantwana abangamankazana bebakhapha ezitaladeni babakhulise angathi ngababo.

Ibandla lakuqala lakholwa njalo ukuthi, njengoba uNkulunkulu watshengisa uthando lwakhe ngokunikela impilo yakhe efela thina, kwakungumsebenzi wabo ukuthi basebenzele abanye ngokuzinikela. Abafundi bakaJesu bazwisisa ukuthi kwakumele babelesineke lomusa ebantwini bonke ngendlela uNkulunkulu abalesineke lomusa kibo. Ngaleso sikhathi kwabalomkhuhlane weKholera. Uma umuntu olomkhuhlane lo enganatha amanzi amathuba akhe okuphila manengi. Engaswela amanzi uyafa. Kodwa umkhuhlane lo owe Kholera uyathelelwana kalula. Ngenxa yokuthi abaseRoma babesesaba ukugula, babesithi bengabona umuntu olalowo umkhuhlane, bamxotshela ezitaladeni ukuthi ayokufa, kulokuthi bamnikeze amanzi. Impilo yomuntu yayingaqakathekanga kibo. AmaKristu wona ayengafani labo. Babehamba kulabo abaleKholera, babaphathele amanzi, babonge. Babekholwa ekusebenzeni kokuzinikela lesineke. AmaKristu amanengi afa ngeKholera, kodwa abanye bebona uthando lwabo abantu abanengi banikela impilo zabo kuKristu. Ibandla lakhula okwamagama.

UKUZIHLOLA

Thatha isikhathi ucabange ngalindaba uthule.

Cela uNkulunkulu akuncedise ubone indlela ophatha ngayo abanye.

- Ubaphatha ngendlela etshengisa ukuthi uNkulunkulu ubabona beqakathekile okokuthi wayengabafela na?
- Kulabanye obaphatha kuhle labanye ongabaphathi kuhle kakhulu na?

Cela uNkulunkulu akuxolele lapho ongaphathanga abantu ngendlela emthokozisayo. Cela ukuthi akutshengise indlela abona ngayo abantu.

INGXOXO YEQEMBU ELINCANE

- Ngobani abanye abantu abavele bekhangelwa phansi?
- Yiziphi ezinye indlela esingatshengisa ngazo abantu ukuthi baqakathekile kuNkulunkulu?

Isifundo sesithathu: Thanda UNkulunkulu Njalo Uthande Umakhelwane

Umqondo Omqoka

UNkulunkulu usibizele ekuthandeni umakhelwane wethu okuyindlela yokutshengisa uthando lwethu kuye. Singatshengisa uthando lwethu kumakhelwane wethu ngokuhlangana lezidingo zakhe.

Impahla Yokusebenzisa

1. Insiza ebonwa ngamehlo:
 - a. Umdlalo womvangeli (ingwalo ezintathu)

Isingeniso – Umdlalo womvangeli

UMDLALO

Iziqondiso Zoqondiso: Khetha abathathu eqenjini abazaphathisa ekwenzeni umdlalo olandelayo. Banikeze ingwalo ze **INSIZA EZIBONWA NGAMEHLO** – Umdlalo womvangeli.

Isingeniso Solandiso: AmaKristu kwesinye isikhathi alalokhu okubizwa kuthwa “ngumbono omncane weVangeli.” Ayazwisisa ukuthi ukwamukela uJesu lukhetho lokuphila kumbe ukufa, kodwa abazwisisi okunye. Uma bengaboni izidingo zabomakhelwane babo, intshumayelo yabo ihle ilahleke. [Ima kancane] Namuhla, sizavakatshela umuzi oswelayo. Abahlala khonapho, umuntu oswelayo ogulayo, oleleyo. Isethekeli, umvangeli wamaKristu ohamba efakazela abantu ezindlini zabo usanda kufika.

UMvangeli (EV): Qoki, Qoki! Bakhona abantu? Ngingangena? (Angene)

Ogulayo (PSP): (Ngezwi elingela mandla) Ngilapha...

EV: Unjani. Ngingu _____ ovela ebandleni le _____. Namuhla ngize ukuzonxusa wonke umuntu ebandleni lethu. UNkulunkulu ubesibusisa ngemvuselelo elamandla. Awungeke ufise ukukhuthwa yiyo.

PSP: (Uyabubula, akhulume esima) Angenelisi ukubuya...angenelisi ukuvuka embhedeni...ngyagula kakhulu angenelisi ukuhamba...ngilahlekelwe ngumsebenzi wami...angila mali yokuthenga umuthi... kumbe ukudla...kumbe ukuhlawulela indlu engihlala kuyo...

EV: Lezo ke yinkinga ezikhulu, kodwa ngiyazi umuntu olempondulo kunkinga zonke ongahlangana lazo empilweni. Sowamamukela yini uJesu Kristu njengomsindisi wakho?

PSP: (Ngezwi elibuthakathaka) Imuli yami labangane bami bangitshiya lapho sengigula njalo sengilahlekelwe ngumsebenzi... ukhona na ongangisiza ebandleni lenu? Ngiyacela?

EV: Uncedo olufaneleyo ongaluthola lutholakala kulencwadi. Ichasisa inhlelo zikaNkulunkulu ngempilo yakho. Uyazi, akusintando yakhe ukuthi ube ulele lapho! Thatha lapha, ufunde, ukhuleke umkhuleko wezoni, ube usukholwa!

PSP: (Ngelizwi elibuthakathaka kakhulu) Angeke... angila mandla... (Uyama ukhuluma, alale okomuntu osefile.)

EV: (Ukhangela ukuba usaphefumula yini) Usaphila! Makadunyiswe uNkulunkulu, Ngifike lapha ukuzofakaza ngesikhathi esifaneleyo! NGizatshiya incwadi le. Sokumele ngiqhubeke ngohambo lwami ngiyofakazela abanye abalahlekileyo. (UKhulumela endlebeni yogulayo ngezwi eliphezulu) Sizakuthandazela, ukhumbule ukuthi uJesu nguye impendulo. (Abesesuka).

PSP: (Uyamkhangela esuka, abesebubula) Ohhhhhhhhhhh...

(Ungenzi lutho – Kumbe yenza okuhambelanayo)

INGXOXO YEQEMBU ELIKHULU

- Yikuyini okwenzakale kulomdlalo?
- Wake wabona kumbe bakhona yini abantu obaziyo abatshumayela ivangeli ngendlela efana lale?
- Kwaphumelela yini lokhu ngemva kwesikhathi eside?
- Lindlela yokufakaza ungayiqathanisa njani lendlela uJesu ayefakaza ngayo?

Imibhalo ikubeka sobala ukuthi uNkulunkulu ukhathazeka ngabantu abasebuhlungwini – lathi kumele sibenjalo. Amanye “amacebo” amahle angasisiza ekuzwisiseni inhliziyu kaNkulunkulu ngabantu atholakala emilayweni kaJesu.

Umlayo Omkhulu

INGXOXO YEQEMBU ELINCANE

Iziqondiso Zoqondiso: Bhala indima lezi emdulini. Uthi amaqembu akhangele iqembu lamavesi abeseqondisa imibuzo.

Bala amavesi alandelayo. Yiziphi izinto ezimbili esilayelwe ukuthi sizenze?

UMathewu 22:36-40 ULuka 10:27

Bala amavesi alandelayo. Amavesi la aqamba into eyodwa kwezimbili eziqanjwe phezulu. Yiphi?

UMathewu 7:12 AbaseRoma 13:9 AbaseGalatiya 5:14

NIKEZA IMPUMELA

Yiphi imilayo emibili esiyibona emavesini akuqala?

- *Thanda uNkulunkulu*
- *Thanda umakhelwane wethu*

UJesu uthi nguphi umlayo omkhulu kule emibili? (*Phinda njalo ukubala uMathewu 22:37-38*)

- *Thanda uNkulunkulu*

Uma umthetho labaprofethi kufingafinyezwa ngomlayo owodwa omkhulu, uyabe ungowuphi?

- *Thanda Umakhelwane wakho*

Ubona angathi kungani uJesu wakhetha ukufinyeza umthetho labaprofethi esebenzisa umlayo lo?

- *Uma bengaphethanga, kungenxa yokuthi sitshengisa uthando esilalo kuNkulunkulu ngezenzo zethu, sibe sesibuyela kulombuzo ngemva kwesifundo lesi.*

Ukuthanda umakhelwane wethu

INGXOXO YEQEMBU ELINCANE

Bala uJohane wakuqala 3:17, uJohane wakuqala 4:20, loJakobe 1:27.

- Amavesi la asifundisani ngokuthanda umakhelwane wethu?

INGXOXO YEQEMBU ELIKHULU

Kulobudlelwano bani phakathi kothando lukaNkulunkulu langendlela esikhangela ngayo izidingo zabantu?

- *Uma sithanda uNkulunkulu, sizatshengisa lokhu ngokuthanda umakhelwane wethu. Uma sisithi siyamthanda uNkulunkulu, kodwa singamthandi umakhelwane wethu, kutshengisa ukuthi asimthandi kangako uNkulunkulu.*

Kuyenzeka yini ukuthi sabelane uthando lukaNkulunkulu singahlangananga lezidingo zabantu?

- *Hatshi*

Singabafundi bakaJesu na uma singafakazeli abantu ngenhlalo yabo, lezidingo zabo zenyama – lezidingo zikamoya – ezabantu?


- *Hatshi. Uma singakhangela umzekeliso wezimvu lembuzi, sehlukani swa yilokho esikwenzayo lesingawenziyo. “Ngoba ngangilambile langinika ulutho oludliwayo, ngangomile langipha okunathwayo...” (UMathewu 25:35). UJesu ukubeka sobala kulomzekeliso ukuthi ukhangelele ukuthi sinakekele izidingo zalabo esihlalisane labo uma singabalandeli bakhe okweqiniso.*

Isiphambano

Iziqondiso Zoqondiso: Dweba umfanekiso wesiphambano emdulini wokubhalela ngendlela etshengisiweyo. Ube usuchasisela iqembu ngomfanekiso lo.

Lumfanekiso wenzelwa ukuthi usisize ukuthi sikhumbule lesi simiso. Umzila oyaphezulu umele ubudlelwano bethu loNkulunkulu. Yiwo umzila omkhulu.

Umzila oquma lo oya phezula umele ubudlelwano bethu labanye abantu. Umzila lo usekelwe ngumzila oya phezulu. Kungela mzila oya phezula, umzila oqumayo ngabe uphansi njalo ungcolile. Lokhu kuliqiniso hatshi emfanekisweni lo kuphela kodwa empilweni zethu njalo. Sidinga uNkulunkulu ukuthi asisize sibe lobudlelwano obuhle.



Ngubani umakhelwane wakho?

Iziqondiso Zoqondiso: Kulomsebenzi, kuzamele ubale indatshana yomSamariya olesihawu abantu belungisela lokho okubalayo. Cela abantu abehlukeneyo balingise ukuba ngabanye abakulendatshana. Kudingakala abantu abayisikhombisa ukuze umzekeliso lo uphume kuhle: Indoda eyodwa, izigebenga ezimbili, umLevi oyedwa, umSamariya, lomgcinindlu.

Omunye wabuza uJesu, “Kumele ngenzeni ukuze ngizuze impilo engapheliyo?” (Ngamanye amazwi, “Ngingangena njani ezulwini?”) UJesu wamtshela izinto ezimbili ezidingakalayo – ukuthi sithande uNkulunkulu lokuthi sithande umakhelwane wethu. Umuntu lo wabuza, “Ngubani umakhelwane wami?” UJesu waphendula ngendatshana elandelayo.

Bala ULukha 10:30-37.

INGXOXO YEQEMBU ELIKHULU

- UmSamariya olesihawu wayemazi na umuntu owayelele phansi?
- UmSamariya olesihawu wenzanjani ngalumuntu? Kwehlukene njani lendlela abanye abenza ngayo?
- UmSamariya olesihawu walutshengisa njani uthando kumakhelwane wakhe? Wenza okwaneleyo na kumbe wadlulisa amalawulo?
- Indatshana le isifundisa ukuthi umakhelwane wethu ngubani?
- Yikuyini esikufundayo kulendatshana ngokutshengisa uthando kumakhelwane wethu?

Ukwenza

Cabanga ngabantu ovame ukubabona. Yikuyini okukodwa nje ongakwenzela omunye umuntu?

Isifundo sesine: Ukukhula endaweni zonke

Umqondo Omqoka

UJesu wakhula endaweni zonke zozine – enyameni, emoyeni, ekuhlalisaneni labantu, lasekuhlakanipheni. Lathi njalo kumele sikhule kulezi ndawo zozine njalo sincedise isigaba lebandla lethu ukuthi likhule ngendlela efanayo.

Impahla Yokusebenzisa

1. Insiza ebonwa ngamehlo
 - a. Iphepha elitshengisa 'Indawo ezakhulwa nguJesu' (Umfundi munye ngamunye athole elilodwa)
2. Iphepha elikhulu lokubhalela kumbe umduli wokubhalela
3. Amaphapha amancane anganamathiselwa emdulini wokubhalela kumbe ephepheni elikhulu lokubhalela.
4. Lingakhetha ukusebenzisa ugwalo Lwezifundi (SG)
 - a. Itshathi kaLukha 2:52

Isingeniso

INGXOXO YEQEMBU ELINCANE

- Umntwana udingani ukuthi akhule kusukela ezalwa aze ayofikisa iminyaka elitshumi lasitshiyagalombili?

Iziqondiso Zoqondiso: Bhala impendulo zabantu emaphepheni amancane (amaphepha la uzawasebenzisa kumsebenzi olandelayo). Uma beletha izibonelo ezingaqambi indawo ezine (khangela ngaphansi), banikeze isibonelo ukuze baphenduke emzileni. Isibonelo: Ekuhlalisaneni labantu: Ubona angathi umuntu angadinga imuli kumbe umuntu ozamthanda?

ULukha 2:52

Bala ULukha 2:52: “UJesu wakhula ngenhlakanipho, ngomzimba langokuthandwa nguNkulunkulu labantu.”

Yiziphi indlela ezine uJesu akhula ngazo? Yiwaphi amabala avame ukuchasisa imihlobo le emine yokukhula?

- | | |
|------------------------------|------------------------|
| • Ukuhlakanipha | ngokwenqondo |
| • Isimo | ngokomzimba |
| • Ngokuthandwa nguNkulunkulu | ngokomoya |
| • Ngokuthandwa ngabantu | Ngokuhlalisana labantu |

Iziqondiso Zoqondiso: Bhala amabala amane avame ukusetshenziswa emdulini wokubhalela kumbe ephepheni elikhulu. Sebenzisa amaphetshana enziwe esingenisweni ube usucela iqembu ukuthi liwahlele liwafaka ezigabeni ezine.

NjengoJesu kumele sikhule endweni lezi ezine. Singasebenzisa ukukhula kukaJesu kube yisibonelo esisitshengisa indlela abantu okumele bakhule ngayo.

Ukukhula kukaJesu

INGXOXO YEQEMBU ELIKHULU

1. Yisiphi isimo senyama/impahla zokusebenzisa/ indlela yokuhlalisana labantu Ujesu akhula kuso? (Wahamba na eUnivesithi? Kwakulamagetsi na endlini yakhe? Wayethola ukudla okwaneleyo na? Wayesenelisa ukubhala lokubala na? Wayelabazali abamthandayo na?)
 - *Ujesu wakhuliswa yimuli eswelayo. Banikela inkwilimba ezimbili. (Bona ULukha 2:24 lo ULevi 12:8.)*
 - *Wayethola ukudla okwaneleyo. Uyise wayesebenza, njalo wayelemuli emthandayo.*
 - *Wafunda njalo ukubala lokubhala ezifundweni zakhe esinagogu.*
2. Ujesu wayelezinto zokusebenzisa na ezokuthi afeze injongo kaNkulunkulu ngaye? Kungani kumbe kungani kwakunganjalo?
 - *UJohane 17:4 usitshela ukuthi uJesu waqeda umsebenzi ayewunikwe nguNkulunkulu. Wenelisa ukufeza injongo yakhe.*
3. Kudingakala inotho enganani ukuze ufike ezifisweni zikaNkulunkulu?
 - *Ujesu wayeswela, kodwa wenelisa ukufeza injongo kaNkulunkulu ngempilo yakhe.*
4. Ujesu wakhula endaweni ezine. Singancedisa abanye ukuthi bakhule kulezi ndawo na? Njani?
 - *Yebo, indawo lezi ezine zisinikeza isibonelo esingasisebenzisa ekuncediseni abanye.*
 - *Ukukhula endaweni lezi ezine ngumsebenzi othatha isikhathi.*
5. Ukukhula kukaJesu kwenzakala khonapho khonapho yini, kumbe ngumsebenzi owathatha isikhathi?
 - *Ukukhula kukaJesu ngumsebenzi owathatha isikhathi – phosa iminyaka engamatshumi amathathu!*
6. Uma ukukhula kukaJesu kwakungumsebenzi owathatha iminyaka eminengi, kudingakala isikhathi esinganani ukuthi abanye abantu bakhule? Kumele sizinikele ukunikela isikhathi esinganani ukuthi abanye abantu abakhule?
 - *Kuthatha isikhathi ukuthi abanye abantu bakhule. Uma sifisa ukubancedisa kumele sibe sizimisele ukunikela amahola amanengi eminyakeni eminengi.*

Ukukwenza empilweni zethu

Akudingi ukuthi sikhule endaweni ezine kuphela njengoJesu, kodwa ukuthi sincipise abanye bakhule labo kulezi ndawo zozine.

Iziqondiso Zoqondiso: Nikeza umuntu munye ngamunye iphepha 'Indawo ezakhulwa nguJesu' (**Insiza ebonwa ngamehlo**) (SG).

Okwakuqala, gcwalisa itshathi le unikeza izibonelo zendlela ongakhula kundawo inye ngayinye njalo ukhuthaze imuli yakho, ibandla, lesigaba ukuthi sikhule kulezi ndawo.

Khumbula uku...

- Khetha izinto ezingenziwa ngeviki eyodwa. Uma ungakhetha ukwenza okukhulu kakhulu, kuzabanzima ukuqeda, njalo impumela yalokhu izaba yikudangala. Khetha into encane ukuze uphumelele njalo ukhethe okulandelayo ngeviki elandelayo.
- Khetha into okade ungayenzi.





Amaqembu angenelisi ukubala lokubhala— uma kunzima ukuthi iqembu ligcwalise izikhala ephepheni xoxani ngalezi ndawo ezilandelayo:

- Cabanga ngendlela ongakhula ngayo endaweni ezine lezi? Yikuyini okunye ongakwenziyo kathesi?
- Cabanga ngemuli yakho. Iyakhula na endaweni ezine? Yikuyini okukodwa ongakwenza kuliviki okunganceda imuli yakho kumbe omunye umuntu emulini akhule kwenye yezindawo lezi?
- Cabanga ngebandla lakho – ngubani ongamncedisa ukuthi akhule kweyinye yezindawo ezine? Kuyini ongakwenza?
- Cabanga ngesigaba sakho – ngubani ongamncedisa ukuthi akhule kweyinye yezindawo ezine? Kuyini ongakwenza?

Gcwalisa ingxenye eseleyo eyetshathu ngamacebo okuncedisa imuli yakho, ibandla lesigaba ukuthi kukhule endaweni ezakhulwa nguJesu.

Iziqondiso Zoqondiso: Nikeza izifundi isikhathi esinengi sokucabanga. Kuqakathekile ukuthi bathole isikhathi esaneleyo ukuthi baphume belamacebo amahle kulokuthi bajahe ukucabanga icebo abangalicabanga.

Zingaqeda, cela abazinikelayo ukuthi babelane amacebo abo labanye. Buza ukuba engabe ekhona amabhokisi anzima ukuthola izibonelo zokuwagcwalisa ubone ukuthi uma iqembu lingahlanganisa amakhanda ngeke laphuma lezibonelo ezihle na. (Uma kungasela sikhathi esaneleyo sokuthi umuntu wonke aqede kuthaza izifundi ukuthi zihambe lomsebenzi lo endlini ziyiqhubeka ukuwenza.)

Indikimba	Indawo ezakhulwa nguJesu			
Okuzakhulwa	Ukuhlakanipha	Okomzimba	Okukamoya	okwenhlalo
 mina	Bala ugwalo kumbe imibhalo ekhuluma ngendawo engifuna ukufunda okunengi ngayo.	Hamba umango omude.	Thatha ingxenye yelanga eyodwa, uyinikele ibe yisikhathi sakho sokuthandaza.	Thumela umngane wakho umbiko okhuthazayo.
 imuli	Sixoxe ngokwenza izaga ezimbili lemuli yami.	Ngigezise imiganu ngemva kokudla ndawonye siyimuli.	Ngihole imuli yami emthandazweni nsuku zonke.	Ngikhiphe umkami “eyotshaywa ngumoya” (abantwana basale)
 Ibandla	Senze imithandazo yangoMvulo sisenza lokhu esiyabe sikufunde ngeSonto.	Silungise indlela edlula phambi kwebandla.	Sithandaze nsukuzonke sithandazela umfundisi labadala bebandla.	Sizanaxusa abzalwane abehlukeneyo ukuthi bezonatha itiye lathi endlini yethu.
 Esigabeni	Sixoxe ngenhlupho ezisesigabeni lomunye wabakhokheli besigaba.	Sibhode izitalada sidobha ingcekeza.	Sinxuse omakhelwane ukuthi baze ukuzokudla ikhisimusi kanye lathi endlini.	Ngidlale ibhola lenyawo labanye abantwana besigabeni.

Isiphetho

INGXOXO YEQEMBU ELINCANE (ABANTU ABABILI KUMBE ABATHATHU)

Emaqenjini alabantu ababili kumbe abathathu (abangadluli abathathu), xoxela abanye into eyodwa ozinikela ekuyenzeni. Khulekelanani licela uNkulunkulu ukuthi alenze lenelise ukufeza elifisa ukukwenza.

Isifundo sesihlanu: UNkulunkulu ufisa ibandla lincedise

Umqondo Omqoka

Ibandla libizelwe ekuthandeni izigaba ngezenzo, ikakhulu ukuhlungana lezidingo zabaswelayo.

Impahla Yokusebenzisa

1. Amaphepha – ingxenye ezimbili ebantwini abane.
2. Insiza ebonwa ngamehlo
 - a. Itshathi elilendlela zokuncedisa – iphepha elilodwa kuqembu linye ngalinye
3. Lingakhetha ukusebenzisa Ugwalo Lwezifundi (SG)
 - a. Itshathi elindlela zokuncedisa

Isingeniso

INGXOXO YEQEMBU ELINCANE (ABANTU ABANE)

Bhala phansi zonke izinto ezenziwa libandla lakho (uma kudingeka dweba umfanekiso omele isenzo esithile).

Iziqondiso Zoqondiso: uma seliqedile, cela amaqembu akuthi abale lokho ayabe ekubhalile libe selitshengisa phambi kwesenzo sinye ngasinye, ukuthi isenzo lesa ngesabazalwane na kumbe ngesalabo abangasontiyo. Kulezenzo ezingaki kuqembu linye ngalinye? Libe selikhangela njalo izenzo ezikhangela labo abaswelayo labayanga. Zingaki?

INGXOXO YEQEMBU ELIKHULU

1. Abantu esigabeni bacabangani ngebandla?
2. Abantu esigabeni bacabanga ukuthi ibandla lenzani?
3. Abantu esigabeni bacabangani ngamaKristu?
4. Abantu besigabeni bayafisa ukubuya ebandleni kumbe kumele lihambe liyobanxusa?
5. Libona angathi abantu besigabeni bengezwa njani uma kungathwa ibandla kalisekho?
6. Ubona angathi lokhu kuyamthokozisa na uNkulunkulu?

Ulsaya 58

Ulsaya wayebhalela abako – Israyeli, ababengabakhethiweyo bakaNkulunkulu. Bayisibonelo kubandla namuhla.

Bala ulsaya 58:1-10 libe seli xoxa:

- Abantu babesenzani?
- UNkulunkulu wenzani ngokwenza kwalababantu?
- Kungani uNkulunkulu wenza njalo?

INGXOXO YEQEMBU ELINCANE (ABANTU ABANE KUMBE ABAHLANU)

Cela iqembu linye ngalinye lifinyeze indatshana le ngokudweba umfanekiso kumbe ngokubhala umutsho. Ngemva kokuba iqembu linye ngalinye selitshengisile umfanekiso walo kumbe umutsho, buza ukuthi bacabanga ukuthi lokhu kungabe kusitshoni ebandleni namuhla.

Itswayi lokukhanya

INGXOXO YEQEMBU ELINCANE KUMBE ELIKHULU

Bala uMathewu 5:13.

- Yiphi eminye imisebenzi yetswayi?
 - *Iyahlanza, igcina izinto ukuthi zingaboli, yengezelela ubunandi.*
- Kungani uJesu esithi amaKristu “alitswayi lomhlaba”?
 - *Kumele sibe lemfundiso enhle endaweni lapho esiphila khona. Kumele silethe imfundiso enza abantu babemsulwa sivekele isigaba sethu ekuboeleni. Lokhu kutsho ukuthi kumele sibone izigaba zethu zisandisa ukwenza njengalokhu uNkulunkulu akufisayo, hatshi ukuthi zehle.*
 - *Ngendlela efana leyokuthi itswayi elilutshwane liyaguqula ubunandi bokudla, amaKristu amalutshwane angaletha umehluko omkhuluesigabeni.*

Bala UMathewu 5:14-16.

- Singenzanani ukuthi sikhanye kakhulu?
 - *Ngokwenza izenzo ezinhle.*
- Umele ube yini umvuzo wokwenza okuhle?
 - *UNkulunkulu wethu ezulwini uyadunyiswa.*

Indatshana zeTswayi lokuKhanya

INGXOXO YEQEMBU ELIKHULU

Bala indatshana yakuqala – AmaSari (Izigqoko) zabomama besiHindu

Amalunga aleli bandla ayezibona eliqenjani elikholwayo elincindezelwayo. Babesesaba ukufakaza ngaphandle kwesigaba samaKristu. Ngemva kokuzwa ukuba kumele batshengise uthando lukaKristu esigabeni sonke, umfundisi wakhuthaza omama bebandla ukuthi bayodingisisa izidingo zesigaba ngeviki eyayilandela.

Ekonzweni eyalandelayo, omama banikeza impumela yokuthi babethole omama besiHindu abalitshumi lambili omunye lomunye wayele sari elilodwa. Ngenxa yokuthi indawo abahlala kuyo iyatshisa isari kumele liwatshwe nsukuzonke. Uma owesifazana elesari elilodwa kutsho uyahlala endlini isari yakhe ayiwatshileyo ize iwome elangeni. Umfundisi wabuza ukuthi babengabakhona na omama abalamasari amathathu ababezimisele ukunikela elilodwa kubomama besiHindu. Omama abaneleyo bazimisela ukuhlalana lohlupho olwalukhuluniwe. Ngeviki eyalandelayo omama bebandla bavakatshela imizi yabomama ababesari elilodwa, babanika elesibili. Omama besiHindu sabathokozisa lesi senzo baze bacela omama abangamaKristu ukuthi babakhulekele. Abanye omama besiHindu ababezithwele bacela njalo ukuthi omama abangamaKristu bakhulekele abantwana babo ababengakazalwa.

Bala indatshana yesibili – Amanzi esigabeni

Kwenye indawo abantu babeswela amanzi okwamagama. Ngemva kokufunda isifiso sikaNkulunkulu sokuthi ibandla lifinyelele ezigabeni zalo, abakhokheli bebandla bakhetha ukudingisisa ukuthi yikuyini ababengakwenza bebodwa ukuthi behlangane lesidingo samanzi. Bathola indawo ababengahlawulela ukweboleka izikhali ezisetshenziswa ngezandla ezokugebha imigodi yamanzi. Abantu baqala bawuphikisa umbono lo – becabanga ukuthi amanzi ayekhatshana kakhulu? Bathi uma imigodi yokugebha ngezikhali ezisetshenziswa ngezandla yayisenza, kungani yayingakagejwa? Kungenani abakhokheli bebandla bakhetha ukuzama. Bahlawulela isikhali esithiwa yi *one-by-one-metre collapsible steel cylinder lewinch*. Bahambisa izikhali lezi esigabeni sabo baqala ngokugebha amanzi ngemva kwesakhiwo sebandla. Bathi sebethole amanzi begebhe amamitha angamatshumi amane lanhlana abantu bathokoza kakhulu.

Abangasontyiyo, akuzange kwabajabulisa lokhu. Bacabanga ukuthi amalunga ebandla azabancitsha amanzi abe ngawabo bodwa. Kodwa ibandla lona lanxusa isigaba sonke ukuthi sizokwabelana lalo kulesi sibusiso

ababesinikezwe nguNkulunkulu esokuphumelela ekugebheni umgodi wamanazi. Ngaleso sikhathi abammeli abavela emaphandleni ayebucwadlana lesigaba, aqala ukucela abakhokheli bebandla ukuthi babancedise ukugebha eyabo imigodi eyayiza kuba seduze labo. Ibandla lavuma kulokho. Sokwedlule umnyaka lezinyanga ezimbalwa, kwasokugejwe imigodi eyitshumi lanhlano – owodwa utshona okwamamitha angamatshumi ayisitshiyagalombili.

Abantu bathokoziswa yindlela ibandla elatshengisa ngayo uthando lukaNkulunkulu, okokuthi ibandla lathi linxusa isigaba ukuthi sizokuzwa ngendaba yothando lukaNkulunkulu, isakhiwo sagcwala abantu ababefuna ukwazi ngokujulileyo ngoNkulunkulu labantu bakhe ababaletshela amanzi.

INGXOXO YEQEMBU ELIKHULU

- Amabandla lawa enzani?
- Ayangamabandla anothileyo na?
- Yiphi impahla yokusebenzisa abayisebenzisayo?
- Kungani benza lezi zinto?
- Izenzo zabo zaba lempumela bani?

Izimvu leMbuzi – UMathewu 25:31-46

INGXOXO YEQEMBU ELIKHULU

Iziqondiso Zoqondiso: Ncedisa izifundi ukuthi zibone ukuthi indaba le igcizelela izinto ezibambekayo. UJesu akanzange athi “Ngangilambile langinika incwadi yokubala” kumbe “ngangisesibhedlela langithumezela intshumayelo erekodiweyo.” Kwakuloncedo olubambekayo ezidingweni ezibambekayo.

Bala UMathewu 25:31-46.




1. Ngumahluko bani okhona phakathi kwemvu lembuzi?
2. Yikuphi okunye okwenziwa yizimvu? Yizinto zikamoya na kumbe ngokwenyama?
3. Ibandla lakho likwenza kangani lokhu okwakhulunywa nguJesu?
4. Kungaba lempumela bani esigabeni uma wonke amalunga ebandla lakho angenza lezi zinto?
 - Bazakhangela ibandla ngelihlo elihle.
 - Impilo zabo zizaguquka.
 - Bazavuma ukufunda ngokujulileyo ngoNkulunkulu.




Indlela zokuncedisa abanye

UMSEBENZI WOKWENZA OWEQEMBU ELINCANE (SG)

Iziqondiso zoqondiso: Nikeza iqembu elincane linye ngalinye itshathi, ‘indlela zokuncedisa’ eliku **INSIZA EBONWA NGAMEHLO**.

Cabanga ngezinye indlela ibandla elingancedisa ngalo abantu abakuzimo lezi – abalambileyo, abomileyo, abanqunu, abangela ndawo yokuhlala, ababotshiweyo. Sebenzisa itshathi, ‘indlela zokuncedisa’ lisebenze ndawonye ukugcwalisa izikhala.

Isimo	Indlela ibandla elinganceda ngayo
Abalambileyo 	
Abomileyo 	
Abanqunu 	

Abangela ndawo yokuhlala 	
Abagulayo 	
Ababotshiweyo 	

Isifundo sesithupha: Ezinye izidingo esinganceda kuzo

Umqondo Omqoka

UNkulunkulu ufuna sikhangele yonke imhlobo yenhlupho ezigabeni zethu. Ufisela izigaba zethu okuhle.

Impahla Yokusebenzisa

1. Ungakhetha ukusebenzisa ugwalo lwezifundi (SG)
 - a. Umfundisi uWong lemibuzo
 - b. Isifundo sendaba kaJose loMaria

Umbono kaMfundisi Wong

INGXOXO YEQEMBU ELIKHULU (SG)

Izinqondiso Zoqondiso: Chasisela izifundi ukuthi uzazixoxela indatshana. Ngemva kokulalela kumele balalele impendulo zemibuzo elandelayo.

- Yiziphi ezinye zezinhlopho ezitholakala esigabeni sikaMfundisi Wong?
- UNkulunkulu usifisela isigaba lesi? Khangela uhlupho lunye ngalunye usutshengisa ukuthi Ujesu watshengisa ukuthi lungalungisiswa njani.
- Ujesu watshela uMfundisi uWong ukuthi ayenzi?

Read Pastor Wong's story.

Kwake kwaba lomfundisi webandla elincane endaweni elabantu abadubekayo eyingxenye yedolobho elikhulu. Ibizo lalumfundisi lalithiwa nguWong. Lumfundisi wayesanda kufika kuleyo ndawo ngoba esizwa ethunye yinkosi. Ibandla lelo lalilincane libantu abangamatshumi amane, abanengi kungabomama labantwana. UWong wayelemisebenzi emibili. Wayesebenza komunye umsebenzi ukuze enelise ukugcina umkakhe labantwana bakhe ababili, ngapha ezama ngamandla onke ukwelusa lebandla lakhe.

Ngelinye ilanga, wavuka emadabukakusa ukuthi ezinike isikhathi loNkulunkulu njangasensukwini. Wavuka, wagqoka wadlula elenjini elalivale lapho okwakulele khona imuli yakhe ngoba indlu yakhe kwakuli kamelo elilodwa. Wakhanyisa isibane sakhe, waqala ukufunda iBhayibhili. Ngalelo langa wayefunda ulsaya 58, esizwa ukukhala kukaNkulunkulu ngendumiso ayikhangeleleyo:

Kayisikho lokhu yini ukuzila ukudla engikukhethileyo: Ukuthukulula izibopho zobubi, ukukhulula imichilo yejogwe, ukuyekela abacindezelwayo bahambe bekhululekile, lokuthi lephule lonke ijogwe? Kayisikho yini ukwabela olambileyo isinkwa sakho, lokungenisa abayanga abayimihambuma endlini, lapho ubona onqunu umembese, lokuthi ungacatsheli inyama yakho?

Wehluleka ukuqhubekela phambili umfundisi uWong. Inhliziyo yakhe yalwa lengqondo zakhe. UNkulunkulu wayenakekela njani abayanga yena uWong wayezibona ephakathi kobuyanga lokudubeka okwakusephula inhliziyo yakhe. Wayesazi indlela abantu besigaba sakhe ababephila nzima ngayo. Babacindezelwe okweqiniso. Loba yena wayengela okwaneleyo okusuthisa imuli yakhe kwezinye izikhathi wayesehluleka lokuthenga umuthi ababewudinga. Wacabanga, "Ungaphi uNkulunkulu? Umbhalo lo ungenelana njani lendingo zalapha eLas Pavas?"

Esahlupheka ngemicabango yakhe, kwaqoqodwa emnyango. "Kwakungaba ngubani, ekuseni kangaka?" wazibuza uWong. Waqonda emnyango, "Ngubani?" izwi phandle lathi "NginguJesu, Wong." "Ubani?" wabuza

uWong. “NginguJesu Wong” laphendula njalo izwi. “Ungubani okweqiniso?” wabuza uWong. Izwi laphendula lathi “Wong nginguJesu, ngize ngoba ngizwe ukukhala kwenhliziyo yakho. Ngifuna ungutshengise okukuhluphayo.”

Izwi leli lalizwakala lingeliqotho. UWong wavula umnyango wakhe. Kwakusamnyama ngakho wabona isithunzi kuphela, kodwa safana lomfanekiso wengqondo ayelawo ngesimo sikaJesu. “Ngena, Nkosi” watsho uWong. “Hatshi, ngifuna ungutshengise isigaba senu ungutshengise lokho okwephula inhliziyo yakho.” Esamangele, wavuma, waxwayisa esithi “kumele sihambe ngonanzelelo ngoba bekusina izulu elikhulu, kulengcekeza enengi, njalo asila zambuzi ezinengi lapha.”

Besahamba ezitaladeni zeBhariyo, uWong waxoxela uJesu ngendaba zezindlu ababedlula kizo. Kuleya kwakuhlala umama owayezithengisile ukuze athole ukudla kwabantwana bakhe. Emkhukhwini olandelayo kwakulesidakwa sendoda eyayitshona umkayo labantwana bayo ma idakiwe – okwakuyinhlalayenza. Laphaya kwakulomuzi womongameli wePhronatho, indoda eliqili eyathathela abantu imali zabo ibethembisa ukuthi izaletshela isigaba ugetsi – kodwa wanathisa njalo wadlala ngayo.

Badlula indawo eligceke phakathi kwesigaba. Kwakumele kube yindawo ehlangana izitalada ezimbili kodwa yayigcwele ingcekeza lamagundwane agijigijimayo. “Uyayibona indlu leya?” wabuza uWong ekhombela umkhukhu owawuphezu kwentaba. “Kuhlala umama labantwana abane. Uphahla lwendlu leya luyavuza okwamagama. Bangabayanga. Balezigqoko lokudla okulutshwane njalo bahlala begulagula.” Ngalesi sikhathi basefike emngceleni wentaba phezukwayo okwakwakhelwe iLas Pavas. UWong wakhombela phambili. “Phansi le khatshana, yikho lapho omama abakha khona amanzi. Akula manzi eLas Pavas.”

UWong wathi esiya ejikweni, wezwa umuntu okhala ngezwi eliphansi. Walandela lomsindo, kwakunguJesu. UJesu wayekhala! UWong wabona ukuthi khonokho okwakwephule inhliziyo yakhe kwasokwephule ekaJesu. Wathi uqala ukukhuluma uWong, uJesu wafinyelela kuye wamgona, wamkhangela wathi “Ngifuna ukukutshengisa engikuhlele ngeLas Pavas”

Ngokuphazima kweso, uWong wazibona esekhangele iLas Pavas iphansi kwakhe. UJesu waqala ukukhuluma, uWong laye wayebona izinto ezazichasiswa nguJesu zisenzakala khonaphokhonapho. Wakhuluma ngabantu bebandla likaWong – bengabayanga benjalo – besabelana labomakhelwane babo ababengabayanga kakhulu kulabo. Nsuku zonke babegcini irayisi encane beyifake egabheni. Ekupheleni kweviki bonke babesiza legabha eligcwele irayisi ebandleni bezokwabelana labazalwane besigabeni ababeswela ukwedlula bona egameni likaJesu. Babesenzanjalo lasentweni einjengesepa. Omama bebandla babevakatshela abafelokazi besigabeni bebandise ukuwatsha, ukupheka lokunakekela intandane uma zigula.

UJesu wakhuluma ngokuqatshwa, uWong wakubona ukuthi abantu babeqatshiwe. Kwakungasi msebenzi ephezulu kakhulu kodwa kwakuyi msebenzi enika iholo lokuthi umuntu wayesenelisa ukuthola okudingakala nsukuzonke ezindlini. UJesu wakhuluma ngezindlu uWong wabona imkhukhu iguquka isiba yizindlu. Kwangasozindlu ezimangalisayo kodwa indlu epheleleyo umuntu angahlala kuyo. UJesu wakhuluma ngamanzi, khonapho nje kwahle kwaba lendawo ezinengana lapho omama labantwana ababesikha khona amanzi ahlanzekileyo. UJesu wakhuluma ngokuhlangezeka, uWong wabona sokulezambuzi ezaneleyo ezingasetshenziswa ngabantu, lengcekeza eyayilapho okuhlangana izitalada ezimbili ingasekho sokulezihlahla labantwana ababedlala bekhabelana ibhola khonapho. UJesu wakhuluma ngempilo eziguqukileyo, uWong wabona umama owayethengisa umzimba wakhe eselomsebenzi ohloniphekayo enakekela abantwana bakhe, isidakwa lesiya sesiyindoda ethandekayo. Umongameli wePhathronatho wayengasasebenzisi imali ngendlela engethembekanga kodwa esenceda isigaba sakhe. UJesu wathi “Wong khangela ibandla!” wakhangela uWong. Laseligcwele. Kwasokulamadoda! Abantu bethokoza. Bedumisa uNkulunkulu ngobuhle bakhe. UWong wayetshumayela, efundisa, ekhokhela abantu emoyeni ngezenzo zokulalela lothando. “Wong lokhu akusoze

kwenzakale ngize ngibuye, kodwa yikho engikuhlelele iLas Pavas. Ngifuna wazise abanye ngalumbono, ukhokhele abantu beLas Pavas ekufezeni lokhu”

UWong waqala ukukhonona “kodwa Nkosi, singabayanga!” “Wong” wabuza ngeliphansi uJesu “Ngubani owadlulisa abantwana bakolSrayeli elwandleni olubomvu? Ngubani owengezela amafutha lefulawa yomfelokazi anela ukusuthisa imuli yakhe okweminyaka emithathu? Ngubani owengeza izinkwa lenhlanzi ezadliwa ngamadoda azinkulungwane ezinhlanu labomama labantwana babo? Ngubani owathulisa isiphepho seGalile?” “Nguwe Nkosi.” Waphendula uWong. “Ngakho ke Wong lalela lokhu engikucele ukuthi ukwenze. Abelanani khonokhu okulutshwane elilakho. Khuluma okuhle engikuhlelele abantu bakho emoyeni lokubambekayo. Ngizasilisa isizwe senu!”

UWong wezwa iqhude likhala. Umkakhe wakhwehlela watshibilika ngale kwelembu. Wayehlezi etafuleni uWong, isibane sakhe sesicitshiwe. Kwasokukhanya. UWong wamdinga uJesu wamswela. Wamangala, “bengiphupha? Inqondo yami ibihlehliswa?” Wayengakwazi kodwa wayekwazi ukuthi wayehlangane loJesu waba lokuzwisisa okutsha ngomcabango uNkulunkulu ayelawo ngabayanga... njalo waba lombono omutsha wendlela ayezakhokhela ngayo abantu ukuthi batshengise uthando eLas Pavas.

INGXOXO YEQEMBU ELINCANE

Iziqondiso Zoqondiso: Yehlukanisa izifundi zingene emaqenjini amabili amancane. Ube suphinda imibuzo ubacele ukuthi baxoxe ngempendulo bendawonye. (SG)

- Yiziphi ezinye zezinhlopho ezitholakala esigabeni sikaMfundisi Wong?
- UNkulunkulu usifisela isigaba lesi? Khangela uhlupho lunye ngalunye usutshengisa ukuthi uJesu watshengisa ukuthi lungalungisiswa njani.
- UJesu watshela uMfundisi uWong ukuthi ayenzi?

NIKEZA IMPUMELA

Yikuyini okufunde kundatshana kaMfundisi Wong lakungxoxo elibelayo ngemibuzo eliyiphiweyo?

- UNkulunkulu ulezifiso ezihle ngesigaba sakhe, enyameni lemoyeni.
- UJesu watshela umfundisi uWong ukuthi amemezela izifiso ezihle ayelazo ngesigaba sakhe.
- Ukuba ngumyanga akusihlupho kuNkulunkulu. Kumele simlalele nje.
- UNkulunkulu uzasilisa ilizwe lethu uma singalandela indlela zakhe.

Izifundo zeBhayibhili

INGXOXO YEQEMBU ELIKHULU

Bala uJeremiya 29:11

- Yiwaphi amacebo uNkulunkulu alawo ngathi? (*ukusiphumelelisa, hatshi ukusilimaza, ukusinika ithemba, ukuze siphile (i.e. sibe lesikhathi esizayo)*)

Isigaba sikaMfundisi uWong sasikhangela lobufebe, ukudakwa, ukuhlukunyezwa, inkohlakalo, lobuyanga obusezingeni eliphezulu. Abantu babengela manzi ahlanzekileyo, ukudla njalo bephila endaweni engahlanzekanga. Kodwa lokhu AYISIKHO uNkulunkulu ayekufisela leso sigaba. **UNkulunkulu ufisela izigaba zethu okuhle.**

Bala ku2 Imilando 7:14

- UNkulunkulu ufuna abantu bakhe benzene? (*sizithobe, sithandaze, siding ubuso bakhe, siphenduke ezonweni zethu*)
- UNkulunkulu uzakwenzani uma singenza lezi zinto? (*Uzakuzwa imithandazo yethu, asithethelele izono zethu, njalo asilise ilizwe lethu.*)

Siyabona inguquko uma siqala ukuphila ngokulalela uNkulunkulu. Umsebenzi wethu njengebandla yikumemeza izifiso ezihle uNkulunkulu alazo ngezigaba zethu ngokuhlangana lezidingo esizibonayo. Uma singalendela indlela zakhe, uNkulunkulu uzasilisa ilizwe lethu.

Isifundo sendaba kaJose loMaria

INGXOXO YEQEMBU ELIKHULU (SG)

Iziqondiso Zoqondiso: kumibuzo minye ngaminye, ezinye impendulo eziyisibonelo zinikiwe zibhalwe ngamatalika. Khumbula, lezi ayisizo zodwa impendulo eziqondileyo, nezinye zezimpendulo eziqondileyo.

Cabanga ukuthi isigaba sikaJo loMariya sifanana lesakho.

Indlu kaJose loMariya yatshiswa; akula ngitsho okwasalayo. Izolo bona – labantwababo abahlanu – bahlala ezihlotsheni. Kodwa kuvele kulabantu abalitshumi abahlala kulindlu encane, ngakho akula ndawo yabanye abantu abayisikhombisa. UJose ngumlimi, njalouseqedile ukuhlanyela insimu yakhe encane, kodwa kuseselenyanga ezintu ukuthi kufike isikhathi sokuvuna. Imali yakhe yonke wayiqeda ethenga inhlanyelo njalo konke ayelakho kwatshiswa ngumlilo.

Yiziohi ezinye izidingo zemuli yakhe?

- Ukudla
- Indawo yokuhlala
- Izigqoko
- Izinto zokuphekisa
- Indawo yokuhlala besamelele eyabo indlu ukuthi yakhiwe.

Yikuyini okukhona esigabeni okungabancedisa?

- Abantu
 - Amandla okuncedisa ekwakheni indlu entsha
 - Abantu abazabe bencedisa ngokuphekela abazinikela ukwakha
 - Abantu abazancedisa ukunakekela abantwana
 - Abantu abazaduduza besekele imuli
 - Abantu abazancedisa ukuhlanza lapho okulendlu eyatshayo
 - Abantu bakaHulumende abazaxasa ngosizo oluphuthumayo
- Impahla zokusebenzisa
 - Imbiza lamapani
 - Ukudla
 - Izigqoko
 - Ingubo
- Izakhiwo
 - Indawo yokuhlala

Isigaba sethu

INGXOXO YEQEMBU ELINCANE

Uma usenelisa, khuthaza amaqembu ukuthi ahambahambe esigabeni sawo okwamizuzu elitshumi kumbe amatshumi amabili ukuthi bazikhumbuze ngezinye inhlupho ezimqoka esigabeni sabo besebephendula imibuzo elandelayo:

1. Yiziphi ezinye inhlupho ezisesigabeni senu?
2. Ubona angathi uNkulunkulu ujongeni ngalezo zimo?

UMSEBENZI WOKWENZA OWEQEMBU ELIKHULU

Iziqondiso Zoqondiso: Sebenzisa ukuvota ngentanga ukuthi likhethe inhlupeho ezintathu eziphezulu kumaqembu aqanjiweyo.

Iziqondiso zokuvota ngentanga:

Nikeza umuntu lomuntu “intanga” ezilitshumi (loba yini okuncane kungasebenza njengentanga, incwathi, amahlamvu, lamatshe njll.) ube subacela ukuthi bafake intanga ezithile kuhlupeho ezibhaliweyo. Bfakae intanga ezinengi emsebenzini ababona angathi uqakatheke kakhulu. Hlanganisa inani lentanga ezifakwe kuhlupeho lunye ngalunye – oluyabe lulentanga ezinengi yilo oluqakatheke kakhulu, olulandela okwesibili lukaqakatheke ngaleyo ndlela, olulandela okwesithathu lalo luqakatheke ngaleyo indlela.

- UNkulunkulu ucela ibandla lakho ukuthi lenzeni?

Thatha inhlupeho ezintathu eliziqambileyo, kolunye lolunye, khulumani ngokuthi lilani esigabeni senu okungancedisa kulohlupho. Khulumani ngabantu, impahla zokusebenzisa, imali, lezakhiwo okukhona okungancedisa ukulungisa lolohlupho.

Thandazani ndawonye ngelizakwenza ukuthi ligcwalise lokhu ebelixoxa ngakho.

Isifundo sesikhombisa: Ukusebenza kombuso wezulu ngenombolo

Umqondo Omqoka

Abayanga labo bayanelisa ukunikela. Ngokwenzanjalo bayabona uNkulunkulu esandisa amandla abo ngendlela emangalisayo.

Impahla Yokusebenzisa

1. Insiza ebonwa ngamehlo
 - a. Isethi yakuqala: Ulsaya 40:29 izibonakalisi (amakhasi amahlanu)
 - b. Isethi yesibili: Amanvilophu ezinkwa ezihlanu lenhlanzi ezimbili (invilophu eyodwa kuqembu linye ngalinye)
 - c. Isethi yesithathu: Amanvilophu kaElija lomfelokazi (invilophu eyodwa kuqembu linye ngalinye)
 - d. Isethi yesine: Amanvilophu omfelokazi womnikelo wakhe (invilophu eyodwa kuqembu linye ngalinye)
 - e. Isethi yesihlanu: Amanvilophu omfanekiso wemali (invilophu eyodwa kuqembu linye ngalinye)

Iziqondiso Zoqondisayo: Uma iqembu lingazwisisi inombolo sebenzisa imidwebo echaza lokhu ababelakho kuqala lasekucineni. Ucele iqembu lilungise imidwebo le lifaka elalokho okwenzakala kuqala kodwa lalokho okokucina kodwa. Babuze ukuthi, “Ngumehluko bani okhona phakathi kwengqumbi lezo ezimbili? Abantu basuka njani engqumbini yakuqala besiya kweyesibili?” NGUNKULUNKULU. Bona ukuthi bayazwisisa ukuthi nguNkulunkulu owandisayo.

Isingeniso: Ulsaya 40:29

Wake wakunanzelela ukuthi iBhayibhili lilezifundo zenombolo? Kulesi sifundo sizakhangela ezinye zezifundo zenombolo ezitholakala eBhayibhilini.

UMSEBENZI WOKWENZA OWEQEMBU ELIKHULU

Bala Ulsaya 40:29. Chasisa ukuthi isifundo sethu sigxile kulivesi.

- Ngubani oqinileyo? Ngubani obuthakathaka?
- UNkulunkulu ususenzelani?
- Singenza ivesi le ibe ngumthetho wokusebenza kwenombolo na? Akesizame ...

Iziqondiso Zoqondisayo: Uma uleqembu elikhu, nxusa abantu abahlanu babuye phambili unikeze omunye lomunye ibala elilodwa kumbe umfanekiso wenombolo (**INSIZA EBONWA NGAMEHLO: Isethi yakuqala**). Uma uleqembu elincane, beka wonke amakhadi phansi lisebenze ndawonye ukuwafaka ngendlela efaneleyo.

“Ubuthakathaka bethu x UNkulunkulu = amandla”

- Yikuyini esingakufunda kule ivesi – i “fomyula” leyi?
 - NguNkulunkulu owandisayo
 - Amandla kaNkulunkulu yiwo aqakatheke kakhulu hatshi ubuthakathaka bethu.

‘Umfana lokudla kwakhe kwemini’: UJohane 6:1-14

Iziqondiso Zoqondiso: Kundatshana yinye ngayinye ekulesi sifundo zilungiselele ukuxoxa lendaba ngobuciko.

Kwakulomfanyana owezwa ukuthi kwakusiza umfundisi owaziwayo elwandleni lweGalile, ngakho wayefuna ukumuzwa efundisa. Wacela imvumo kunina kodwa unina wala esithi kwakukhatshana njalo lokudla kwemini kwasokuzalunga. Waqhubeka ecala lumfanaya unina waze wavuma, wasemfakela ukudla kokuthi ahambe lakho esitsheni, wahle wasuka.

Uthe efika lapho ayesiya khona lumfanyana, wathola sokugcwele abantu. Njengokwenziwa yibo bonke abafana abancane waziminyezela ebantwini waze wayofika phambili. Wacina eyitholile indawo lapho ayesenelisa ukuzwa umfundisi labafundi bakhe. Yayimangalisa indlela umfundisi ayekhuluma ngayo lezinto ayezitsho zazimangalisa, waze wakhohlwa lokuthi kakadli ukudla kwakhe kwemini umfana lo.

Uthe esesizwa indlala wacabanga ukuthi unina wayemfakela ukudla. Wafinyelela iskhwama sakhe kancanekancane engafuni ukucina eskhangelwe ngabantu.

Khonapho nje umfundisi wama ukufundisa watshela abafundi bakhe ukuthi banike wonke umuntu ukudla. Wathalaza umfanyana wabona ukuthi ixuku labantu laselifika inkulungwane ezingamatshumi amabili, wamangala wazibuza ukuthi, “Bazakwenza njani ukudla kwabantu abanengi kangaka?” esazibuza lokho kwangathi bacabanga okufanayo labafundi omunye wabo wabuza umfundisi ukuthi babezayithola ngaphi imali yokuthenga ukudla kwexuku elingako. Kwakuyathatha phose iholo lomnyaka wonke.

Umfundisi wabuza, “Lilani?” umfanyana wazama ukufihla ukudla kwakhe kodwa wayesephuzile. Omunye wabafundi uAndreya wambona. “Mfundisi” watsho uAndreya “silezinkwa ezinhlanu lenhlanzi ezimbili.” “Lethani lapha” waphendula umfundisi.

Ubona ngani yikuyini okwalandelayo?

“Umfundisi ufuna ukudla kwakho,” uAndreya watshela umfanyano lo. Wavuma umfanyana waqhubela uAndreya ukudla kwakhe, uAndreya yena wakuqhubela umfundisi.

UJesu watha ukudla kwalumfana wabonga waqala ukwaba ukudla lokhu. Umfanyana wabukela emangele engakholwa ebona abafundi belokhe beqhuba ukudla. Wonke umuntu wayesidla njalo abantu badla baze basutha. Wakhangele ebantwini wabona ukuthi kwasala ukudla okwagcwala izitsha ezilitshumi lambili.

Kwasokumphuzela ukuthi afike endlini ayoxoxela unina lumfanyana. Wagijima waze wayofika endlini wafika waxoxela unina egcwele injabulo ukuthi ukudla kwakhe kwadliwa ngamadoda ayinkulungwane ezinhlanu labomama labantwana. Unina wehlisa iphika wathi “mntanami ufuna ngikutshele kangaki ukuthi ungaboqamba amanga!”

- Indaba le singayiguqula njani ukuthi ibe yifomyula?

UMSEBENZI WOKWENZA OWEQEMBU ELINCANE (ABANTU ABATHATHU KUMBE ABANE)

Iziqondiso Zoqondiso: Nikeza iqembu linye ngalinye invulophu elamaphepha “umfana lokudla kwakhe kwemini” (**INSIZA EBONWA NGAMEHLO** isethi yesibili) KUMBE yenza imifanekiso emikhulu usucela iqembu ukuthi lisebenze ndawonye lenze ifomyula. Banikeze amacebo azabancedisa ukuthi bathole impendulo. Iqembu lingenza ifomyula yenombolo eyodwa lindawonye, sebengangena emaqenjini amancane benze aseleyo.

Impendulo: “Umfana + 5 Izinkwa + 2inhlanzi x UNkulunkulu = Ukudla kwamadoda angu5000 + ukudla kwabafazi labantwana +amabhakede 12”

Kathesi yikho ukusebenza koMbuso wezulu ngenombolo ke!

INGXOXO YEQEMBU ELIKHULU

- UJesu wayekudinga yini ukudla komfana? Kwakulenze indlela yini ayengakwanisa ukunikeza abantu laba ukudla?
- Kungani uJesu wakhetha ukuthatha ukudla komfana okuyikho kodwa ayelakho?

Sisakhangele imibuzo le, sizaqhubekela phambili sisenza inombolo zombuso wezulu.

‘Umfelokazi lokudla kwakhe kokucina’: 1 Amakhosi 17:7-16, 18:1

Kwakuyikhathi esinzima embalini kalsrayeli. Ilizwe lalisendlaleni enzima okweminyaka emithathu lengxenywe. Abantu babesifa lomphrofethi kaNkulunkulu uElija wadubeka.

Kodwa uNkulunkulu wasebenzisa umfelokazi ukunakekela uElija. UElija esahamba wabona owesifazane edobha incwathi, uNkulunkulu wathuma uElija ukuthi eyocela “inkezo elamanzi okunatha.” owesifazana lo wavuma ukulethela uElija amanzi kodwa engakawalethi, uElija wacela ukuthi amlethele isinkwa kuqala loba yena lomntanakhe bengakadli.

Owesifazana waphendula wathi “Kuphila kukaJehova uNkulunkulu wakho, ngilokwanele mina lomntanami okwanamhla kuphela emva kwalokho siyakufa.” uElija waphendula wathi, “Ungesabi uNkulunkulu uzakupha”

Owesifazana wahamba ukuyokwenzela uElija ukudla ngamafutha lefulawa engcosana ayesele layo. Esesebenzise konke ayesele lakho ukwenzela uElija isinkwa wamangala iziphiso zakhe zamafutha lembiza yakhe yefulawa sokugcwele futhi angathi akuphungulwanga. Owesifazane wathi kuElija “ngisebenzise konke ebengilakho ngilungisela wena kodwa kathesi sokuphendukile. UDumo malube kuNkulunkulu!”

IBhayibhili lisitshela ukuthi uNkulunkulu akazange anike okwakwanele uElija yedwa kodwa okwakwanele lowesifazana lemuliyakhe okweminyaka emithathu lengxenywe! Isimanga.

- Indatshana le singayiguqula njani ukuthi ibe yifomyula?

UMSEBENZI WOKWENZA OWEQEMBU ELINCANE

Iziqondiso Zoqondiso: Abela izifundi ama envelophu (**INSIZA EBONWA NGAMEHLO** Isethi yesithathu) ube usuvumela iqembu linye ngalinye lizame ukwenza ifomyula.

Ku envelophu yalabo abangenelisi ukubala faka amabala kumbe imifanekiso yalokhu:

- Umfelokazi
- Ikhekhe elilodwa
- Ukudla kwabantu abathathu okweminyaka emithathu

Impendulo: “Umfelokazi + 1 khekhe x Nkulunkulu = 1 khekhe x Umfelokazi, umfana lo Elija x 365 amalanga x 3 iminyaka = 3,285 amakhekhe”

Yikusebenza koMbuso wezulu ngenombolo!

INGXOXO YEQEMBU ELIKHULU

- Umfazi lo wayengumyanga na?
- Kulenye indlela uNkulunkulu ayenganikeza uElija ukudla ngayo na?
- Kungani uNkulunkulu watshela uElija ukuthi ahambe kumfelokazi ongumyanga ayocela ukudla?
- Kungani uNkulunkulu wacela umfana ukudla kwakhe okwakuyikho kodwa endatshaneni yezinkwa lenhlanzi?
- Inhliziyo kaNkulunkulu iyathinteka ngabafelokazi labayanga na?

‘Umfelokazi lenhlanzi zakhe ezimbili: UMarko 12:41-44

Ngelinye ilanga uJesu wahlala bucwadlana lesitsha somnikelo, wabona abanothileyo befuna ukubukwa lapho benikela. Omunye owesifazana ongumyanga wayelenhlanzi ezimbili nje. Ngoba yikho konke ayelakho, akazange athande ukuthi umnikelo wakhe ubonwe ngabantu ngakho wanikela efihla. UJesu wabuthanisa abafundi bakhe wathi “Lo owesifazana unikele ukwedlula bonke.”

INGXOXO YEQEMBU ELIKHULU

- UJesu wayesitshoni? Wanikela okunengi njani?
- Kungani uJesu engazange wamtshela ukuthi “Hatshi, mama, uyidinga ukwedlula ithempeli.” Wayengamtshela lokhu, kodwa kazange. Kungani?

Kulokuthi athi ayekela, uJesu wananzelela umnikelo wakhe. Kusukela khonapho indaba yomnikelo wakhe yalotshwa phansi ukuze ibalwe ngabanengi. Kuliqiniso ukuthi wanikela okunengi, kuliqiniso sibili lokhu. Ngoba okweminyaka edlula 2000, amaKristu agqugquzelwa nguye. Cabanga ukuthi kunikelwe okunganani ngenxa yesibonelo sakhe. Lokhu yikwandiswa OKUKHULU kulakho konke. Wanikela lokhu ayelakho, uNkulunkulu wakwandisa. Lokhu yikusebenza kwenombolo zoMbuso weZulu!

UMSEBENZI WOKWENZA OWEQEMBU ELINCANE

Sebenzisa **INSIZA EBONWA NGAMEHLO** amaphepha aqunywileyo ukwenza ifomyula yenombolo

Impendulo: “Umfelokazi + 2 inhlanzi x UNkulunkulu = iminyaka edlula 2000 eyokugqugquzela!”

Khumbuza izifundi ukuthi:

- UNkulunkulu wacela umfanyana ukuthi anikele ukudla kwakhe kwemini okwakuyikho kodwa...
- Wacela umfelokazi ukuthi anikeze uElija ukudla kuqala, emnikeza ukudla kwakhe okokucina...
- Wavumela umfelokazi ukuthi anikele konke ayelakho...

INGXOXO YEQEMBU ELIKHULU

- UJesu wakhupha abayanga ekunikeleni na?
- Kukhona na “okuncane kakhulu” kumbe “okungasilutho” ukuthi kunikelwe kuNkulunkulu?
- UNkulunkulu uyakubusisa na ukunikela kwabayanga?
- Yiziphi ezinye indlela uNkulunkulu abusisa ngayo ukunikela kwethu?
 - Izibusiso ezibambekayo
 - Ukubona impilo zabanye ziguquka
 - Inguquko esigabeni
 - Impilo ziyasindiswa

Loba kwezinye izikhathi sithola izibusiso ezibambekayo akuhlali kunjalo. Kwezinye izikhathi uNkulunkulu uyasibusisa ngokusebenza sibe yingxenye eletha umehluko esigabeni sethi kumbe ukusebenza sibone omunye umuntu ebuya kuKristu. Kwezinye izikhathi uyasibusisa ngempahla zokusebenzisa. Siyakhunjuzwa

kwabaseKorinte 9:11 ukuthi okwenza uNkulunkulu asibusise yikuthi ufuna siqhubekele phambili siphana ezimeni zonke ukuze uNkulunkulu adunyiswe.

Nansi enye indatshana. Le ayithokozisi kangako...

‘Umfanekiso Wemali: UMathewu 25:14-30

Kwake kwaba khona indoda eyisinothi eyaya kwelinye ilizwe. Indoda le yayifuna ukuhamba uhambo lwesikhathi eside. Ingakasuki yabiza inceku zayo ezintathu. Kweyakuqala yanikeza amathalenta amahlanu (ithalenta yimali enengi kakhulu) yathi “Uwasebenzise ngize ngiphenduke.” Kweyesibili yanikeza amathalenta amabili yaphinda njalo yathi “Uwasebenzise ngize ngiphenduke.” Kweyesithathu yanikeza ithalenta elilodwa yaphinda njalo yathi “Ulisebenzise ngize ngiphenduke.”

Yasuka leyo ndoda eyisinothi yahamba yayophenduka ngemva kwesikhathi eside. Yazibiza njalo inceku zayo ezintathu yabuza ukuthi zazisebenze njani ngesikhathi ingekho. Inceku yakuqala yaphendula yabika ukuthi yayemukele amathalenta amahlanu yasihamba yathengiselana ngawo yenza amanye amathalenta amahlanu. Inkosi yayo yasisithi kiyo, “Wenze kuhle! Nceku ethembekileyo ubulokulutshwana sulokunengi.” Eyesibili layo yabika ukuthi yayisithole amanye amathalenta amabili phezu kwamabili eyayiwemukele. Yaphinda njalo inkosiyathi, “Wenze kuhle! Nceku ethembekileyo ubulokulutshwana sulokunengi.”

Inceku yesithathu yachaza isithi, “Nkosi bengikwazi ukuthi ungumuntu olukhuni, ngasengisesaba ukulahlekelwa lithalenta lakho, ngalifihla emhlabathini ngakho alilahlekanga” Inkosi yaphendula yathi, “Nceku embi elivila!” yathatha ikhoyini layo layinikeza inceku yokuqala yayixotsha embusweni wayo.

Lokhu lakho kuyindlela yokusebenza koMbuso wezulu ngenombolo. Akesibone...

UMSEBENZI WOKWENZA OWEQEMBU ELINCANE

Iziqondiso Zoqondiso: Abela ama envelophu (INSIZA EBONWA NGAMEHLO Isethi yesihlanu) uvumele iqembu linye ngalinye lizame ukwenza ifomyula.

Impendulo: “incek + 1 ithalenta x 0 (ukungenzi lutho) = 0 ukukhula + inceku yajikelwa ebunyameni”

INGXOXO YEQEMBU ELIKHULU

- Nubani owanikezwa okulutshwane kulabo bonke? Kodwa khangela ukuthi kwenzakalani!
- UNkulunkulu akazikhathazi ngabayanga na? Kungani waxotshwa embusweni?
- Ngumvuzo bani okhona, lakulabo abangabayanga, uma bengaleli uJesu?

Isiphetho

INGXOXO YEQEMBU ELINCANE

1. Siyaphana yini ngalokho uNkulunkulu asinikeza khona?
2. Ibandla lethu liyaphana yini ngalokho uNkulunkulu alinikeza khona, kumbe siyazisebenzisela thina sodwa?
3. Yiziphi indlela esibone uNkulunkulu esibusisa ngazo ngokuphana kwethu?
4. Yinguquko bani engingazenza ukuze ngenze lokhu empilweni yami lasebandleni?

Isifundo sesitshiyagalombili: Izenzo zothando

Umqondo Omqoka

Singathanda isigaba sethu ngokutshengisa izenzo zothando. Izimo sesenzo sothando yilezi: lesenzo senzela ukutshengisa uthando lukaNkulunkulu, senziwa ngokulalela uNkulunkulu, emandleni kaNkulunkulu, senzela ukuthi uNkulunkulu adunyiswe, senziwa ngempahla ekhona, sincane njalo asihluphi ukwenza.

Impahla Yokusebenzisa

1. Umvuzo omncane owomsebenzi wokwenza ozasebenzisa impahla etholakala lapho esikhona.

Iziqondiso Zoqondiso: Isifundo lesi sigoqela ukukhumbula izimo eziyisikhombisa ezesenzo sothando. Sikhuthaza ukuthi lezi zimo sizenze ngomfanekiso othile owezandla ukuze kubelula ukukhumbula. Isibonelo - ukuthi senziwa ngamandla kaNkulunkulu kungatshengiswa ngokuqinisa ingalo zakho. Ukuthi senzwa ngokulalela uNkulunkulu kungaba yizindla ezibekwe ndawonye okutshengisa umuntu okhulekayo. Usangenisa isimo sinye ngasinye, khangela ukusetshenziswa kwezandla ekwenzeni imifanekiso yesimo sinye ngasinye.

Isingeniso

INGXOXO YEQEMBU ELIKHULU

- Yiziphi ezinye izinto elivame ukuzenza njengebandla ukuze litshengise uthando kulabo abangakhonziyo esigabeni senu?
- Bangaki abantu abaphathisa kulokhu?
- Likwenza ngemva kwesikhathi esinganani lokhu?
- Likhetha njani ukuthi lifuna ukwenzani?
- Abantu bakuthatha njani lokhu?
- Kungani lisenza lezi zinto?

Izenzo zothando

Ezifundweni ezimbalwa ezidluleyo sikhunjuzwe ngendlela uNkulunkulu athanda ngayo umuntu wonke. Sibonile njalo ukuthi sitshelwa ukuthi sithande umakhelwane wethu. Izenzo zothando ngezinye yezindlela zokukwenza lokho.

Izenzo zothando yimisebenzi emincane eyenziwa libandla ukuze litshengiswe uthando lukaNkulunkulu esigabeni salo. Lezi zenzo zivame ukuba lula njalo zingenziwa ngosuku olulodwa.

Kulezimo eziyisikhombisa ezesenzo sothando. Kulesi sifundo sizacubungula izimo lezi eziyisikhombisa.

1. Senzelwa ukutshengisa uthando lukaNkulunkulu

Enye yezinjongo ezimqoka ezesenzo sothando yikutshengisa uthando lukaNkulunkulu esigabeni sakho.

Kwesinye isigaba, ibandla lacabanga ukwenza isenzo sothando. Lezwa uNkulunkulu elitshela ukuthi lincedisela uNkosikazi wenye indoda eyayingumholi weqembu lezigelekeke kuleyo ndawo. Lalisesaba ibandla ngoba lumholi wezigelekeke wayelendumela yokuzonda lokutshaya abantu ngenxa yezizatho ezincane. Kungenani ibandla lafisa ukulalela uNkulunkulu. Lamelela umholi wezigelekeke waphuma edolobheni esiya kwenye indawo, ibandla lasala lincedisela uNkosikazi wakhe ukuvuna emasimini lokulungisa isivuno ukuthi sifanele ukuyathengiswa. Umholi wezigelekeke uthe ephenduka, ebona kuvuniwe waqala ukumemeza, “Ngubani

oyenze lokhu?” Umkakhe waqala esesaba ukuthi atsho ukuthi ibandla yilo elalimncedisile, kodwa esesaba ukuthi sokungaba ngumsindo, wacina esevuma ukuthi ibandla yilo elalimncedisile. Umholiwezigelekeqe waphuma ngesiqhubu emnyango eqonda esontweni wayoqoqoda ngamandla emnyango. Ngemva kokubiza amadikhoni ukuthi azomncedisa, umfundisi wavula umnyango, wangena. “Kungani lenze khonokhu?” Wabuza. Ngendlela elula nje baphendula bathi besifuna ukutshengisa uthando lukaNkulunkulu. Indoda le yaqala ukukhala, isithi akula muntu owake wayithanda empilweni yayo. Yaphenduka yaba ngumKristu, yaguqula impilo yayo, yaqhubeka yafakazela ezinye imuli eziyisithupha zasuka ebugelekeqeni zanikela impilo yazo kuKristu.

- Saba lempumela bani lesi senzo sothando?
- Ubona angathi umholi wezigelekeqe wayezaphendula ngendlela efanayo ukuba ngabe bafika bamfakazela ngevangeli?

Injongo emqoka eyesenzo sothando yikulalela umlayo kaNkulunkulu wokuthi sithande umakhelwane wethu. Sifuna ukutshengisa uthando lukaNkulunkulu esigabeni sethu, Okwakuqala, kuhle ukucabanga ngalabo esingavamanga ukubatshengisa uthando, labo esingakhonzi labo.

- Ubona angathi kungani kuqakathekile ukutshengisa uthando lukaNkulunkulu kulabo abangasimaKristu?
 - *Abantu abanengi abangakhonziyo abazimisela ukubuya ebandleni ukuthi bazokuzwa ngoNkulunkulu. Kodwa ngendlela efana lale ekulindatshana, uma bengabona uthando lukaNkulunkulu, kungadala umehluko omkhulu.*

2. Kumele senziwe ngokulalela uNkulunkulu

Njengakukho konke kumele sibone ukuthi sihamba ngokumhlalela uNkulunkulu. Singakakhangelisi ukuthi kulezidingo ziphi lokwenza uhlelo lwethu thina ukuthi sizancedisa njani, sifuna ukuqala ngomthandazo, sibuze uNkulunkulu ukuthi ufuna senzeni. **Izenzo zothando ezivame ukudala umehluko omkhulu yilezi ezingazwisisekiyo.**

Cabanga ngendaba esisanda ukuyizwa eyomholi wezigelekeqe.

- Ibandla lakhetha njani ukuthi litshengise bani uthando lukaNkulunkulu?
 - *Lathandaza uNkulunkulu walambulela ukuthi lithande umholi wezigelekeqe.*
- Ubona angathi babezakhangela umholi wezigelekeqe ngabe bona baqala ukuzidingela abangabe befuna ukuncedwa esigabeni?

Kwesinye isikhathi ezinye izinto uNkulunkulu asicela ukuthi sizenze azizwisiseki kweyethu imicabnago – njengokuthanda umholi wezigelekeqe. Kodwa singaba lesibindi sokuthi uma uNkulunkulu esiholela ekwenzeni ulutho, kuyafeza izifiso zakhe, thina siyabusiwa yikuphathisa enhlelweni zakhe.

3. Zincane njalo zilula

Uma liqala ukwenza izenzo zothando, silikhuthaza ukuthi likhethe izinto ezilula kakhulu. Izinto elingazenza ngosuku olulodwa.

- Ubona angathi kungani kuqakathekile ukuqala ngezenzo zothando ezincane njalo ezilula?

Cabanga ngemiqondo le emine: Uma singaqala ngento encane njalo elula...

1. **Siyenelisa ukuyiqeda.** Uma singenza okunye okukhulu, kulula ukuthi kusikhulele njalo kunzima ukuthi siphumelele ekukwenzeni. Kodwa uma singenza into encane njalo elula, kulula ukuthi senze siqede.
2. **Abantu abanengi bengaphathisa.** Kulula ukuthi abantu bafune ukuphathisa emsebenzini omncane njalo bazinikele kiwo uma bekwazi ukuthi lilanga elilodwa nje kumbe yimini eyodwa nje. Bayathi, “O, lokho ngingakwenza. Ngiyabe ngikhululekile ngaleyo mini.” Kodwa uma kungumsebenzi omkhulu

othatha amalanga amanengi ukuthi uphele, abantu bavame ukudonda ukuzinikela bona uqobo kanye lempahla zabo zokusebenzisa. Lokhu kuliqiniso ikakhulu uma umqondo wokwenzela abanye okuthile usesemutsha kibo.

3. **Silethuba lokwakha ulwazi lwethu.** Mhlawumbe asilalwazi olungako ngokwenza imisebenzi ethile. Lokhu kusinikeza ithuba lokwenza umsebenzi olula ukuze sifunde singakazami ukwenza umsebenzi onzima kakhulu.
4. **Siyaphumelela masinya.** Ngokuphumelela emsebenzini emncane, abanye bazahawukela ukuphumelela kwethu bafune ukusebenza lathi. Uma lisaqalisa kungaba labalutshwane abasukumela phezulu. Kodwa ungaqhubeka ufundisa njalo usenza imisebenzi eminengi, abantu abanengi bayabe sebefuna ukusebenza kanye lawe.

Kungcono ukwenza izenzo zothando ezincane ngemva kwesikhatshana (kanye ngeviki kumbe kanye emavikini amabili) kulokwenza umsebenzi omkhulu. Ukwengeza kulokhu okukhulunyweyo phezulu ngobuhle bokwenza imisebenzi emincane, okunye okuhle ngokwenza izenzo zothando ezincane yikuthi kwenza abantu besigabeni babone ibandla lilesineke.

4. Senziwa kusetshenziswa impahla ezitholakala esigabeni UMSEBENZI WOKWENZA LOMNGANE

Sizadla umdlalo. Cabanga izenzo zothando ezingenziwa libandla ukuthi lincediswe abantu lingazange lasebenzisa ngitsho imali. Zama ukubhala konke okwaziyo. Abangane abayabe belempendulo ezinengi ngemva kwemizuzu emihlanu bazaphiwa umvuzo.

Iziqondiso Zoqondiso: Ngemva kwemizuzu emibili, bakhumbuze ukuthi bacabange ngolwazi abantu abalalo ebandleni olunganikelwa. Ngemva kwemizuzu emihlanu ithi iqenjane linye ngalinye likhulume izenzo zothando eliyabe lizicabangile. Nikeza umvuzo, ongaba yikudla okuthandwa ngabantu, kulabo abacabange okunengi.

INGXOXO YEQEMBU ELIKHULU

- Ubona angathi kungani kuqakathekile ukwenza izenzo zothando usebenzisa impahla ezikhona esigabeni sakho?
 - **Kuba yikubonisa uthando**

Khumbula indaba yamaSari esifundweni sesihlanu. Ubona angathi kwakuzaba lesisindo na ngabe enye yamaNGO amakhulu yabuya lamasari esigabeni? Hatshi kwakungasoze.

 - Kungani abantu bezwa bethandiwe?

Kungenxa yokuthi babona uthando lwebandla ngoba lazimisela lanikela. Uma isigaba singaboni ukuthi kulokuzinikela kumbe ukuzama okwabakhona, asisoze sibone uthando uNkulunkulu alalo kiso ngendlela efanayo.
 - **Izibusiso zokunikela.** Bala 2 AbaseKorinte 9:6-11. UNkulunkulu usitshela ukuthi uzasibusisa ngesilinganiso salokhu esikunikeleyo. Khangela njalo emavesini la.
 - Kungani uNkulunkulu esibusisa?
 1. Ukuze siphane ngazozonke izikhathi.
 2. Ukuze uNkulunkulu adunyiswe.
- Amabandla anikela echelesile, siwabonile ebusiswa nguNkulunkulu. Aseqale ukuphuma ebuyangeni. Kodwa okuqakatheke kakhulu yikuthi ayanelisa ukuphona ukwedlula kuqala njalo ayanelisa ukwenza ezinye izenzo zothando ezinengi.

5. Senziwa ngamandla kaNkulunkulu

Bala uJohane 15: 1-8.

- Indatshana le isitshelani ngalokhu esenelisa ukukwenza ngamandla ethu? Ubona angathi lokhu kutshoni?
- Siyathela njani izithelo ezinengi?

Ukusiza abantu kungaba nzima kakhulu. UNkulunkulu kuphela nguye ungaletha inguquko esifisa ukuyibona ezigabeni zethu. Uma sifuna ukubona izigaba zethu ziguqulwa ngezenzo zothando, kumele sikhangele kuNkulunkulu sicele ukusizwa nguye.

Kumele sihlale sithandaza singakenzi, sisenza, ngemva kokwenza izenzo zothando. Uma sihlalana lobunzima kumbe okungasiphazamisa, kumele sicele uNkulunkulu asenzele indlela kulokhu. Uma singadinwa kumbe sidangale, sithemba uNkulunkulu ukuthi asinikeze amandla okuthi siqhubekele phambili.

6. Nxusa abantu abanengi

UMSEBENZI WOKWENZA OWEQEMBU ELIKHULU

Iziqondiso Zoqondiso: Dala amaqembu amabili –uA loB. Cella iqembu A ukuthi likhethe umuntu oyedwa ozalimela. Tshela iqembu lesibili ukuthi wonke umuntu uzaphathisa. Chasisela amaqembu amabili ukuthi kumele baxhumanise inhlangothi ezimbili ezekamelo leli besebenzisa loba yini abazayithola. Kuqembu A, umuntu oyedwa nguye ozakwenza wonke umsebenzi kodwa uyavunyelwa ukucela izinto kwabanye abakuqembu lakhe. Kuqembu B, wonke umuntu uyasebenza ukudinga lokufaka izinto ezizaxhumanisa inhlangothi ezimbili ezekamelo. Chasisela iqembu A ukuthi alivunyelwa ukukhuluma. (Uma bengakhuluma, uthi, “Sicelani lithule; iqembu lenkonzo liyasebenza.”)

Amaqembu amabili engaqeda buza:

- Ngubani oqale ukuqeda?
- Kuyini esikufundayo kulomsebenzi wokwenza?
- Iqembu A
 - Umuntu oyenze umsebenzi wonke eyedwa uzwe njani?
 - Lina abanye bonke lizwe njani? Belilesifiso sokuphathisa na?
- Iqembu B
 - Libona angathi yibuphi ubuhle bokuba labantu abanengi besebenzela ndawonye?
- Uma sisenza izenzo zothando siyazama ukwenza umuntu wonke aphathise – ubona angathi kungani lokhu kuqakathekile?

Amabandla amanengi avame ukusebenzisa abantu abalutshwana ukuthi benze wonke umsebenzi. Abantu labo bengaphangisa ukudinwa bazwe sebefuna ukwekela, abanye laba abangasebenziyo bacina bebhawakala kumbe besizwa angani izipho zabo azisetshenziswa. Abakhuli elwazini lwabo kumbe ekholweni lwabo. Kwezinye izikhathi kuyasikhathaza ukuthi sicelwe ukuba sikiphe imali zethu kodwa singaphathisi kulokho okwenziwayo. Uma ungenza isenzo sothando, sebenzisa abantu abanengi ongabathola ebandleni kuloba yini oyenzayo. Kunengi esikutholayo ebucikweni babantu lamandla abo. Isenzo sothando esihle akusikho ukuthatha izinto zabantu unikele, kodwa ukwenza umuntu wonke aphathise ekwenzeni umsebenzi lo ndawonye. Eminye imisebenzi eyenziwa ngamanye amabandla amalunga awo esebenza ndawonye yilezi: Ukuhlanya ukuhlanya amanzi, ukukhipha ingcekeza emigelweni lasemigwaqweni, lokuhlanya ikilnika.

7. Senzelwa ukuthi uNkulunkulu adunyiswe

Bala UJohane 15:8 njalo.

- Yisiphi isizatho sokuthela izithelo ezinengi?

Bala UMathewu 5:13-16.

- Kungani sisenza okuhle?
- Injongo yethu kumele ibe yini uma sisenza izenzo zothando?

Ngemva kokwenza izenzo sothando, kumele sithathe isikhathi sihlolisise. Sibe lempumela bani? Cabangani ngendawo lezi ezintathu:

1. Abantu basizakele yini?
2. Umsebenzi wenziwe ngendlela elothando yini?
3. UNkulunkulu udunyisiwe yini?

Kwezinye izikhathi abantu bengabona izenzo zethu zothando bayathanda ukuzwa ngoNkulunkulu. Lokhu akwenzakali iskhathi sonke. Eqinisweni asisoze sathola ithuba lokukhuluma ngoNkulunkulu ngesikhathi sonke uma sisenza izenzo zothando. Kodwa singadinga ukudumisa uNkulunkulu ngezikhathi zonke ngokwenza izinto ngendlela emphakamisayo. Loba isimo sethu, intokozo yethu, lokuzimisela kwethu ekusebenzeleni abanye kungaba yibufakazi obuletha ukuphakanyiswa lodumo kuNkulunkulu.

Isiphetho

Iziqondiso Zoqondiso: Chasisa ukuthi esifundweni esilandelayo sizahlela izenzo sothando. Uma ufundisa kanye ngeviki thathani iskhathi lesi kule iviki ukuthi licabange ibandla lenu elingakwenza kube yisenzo sothando.

Vala ngokubuyelela izenzo zezandla njalo.

Isifundo sesitshiyagalo lunye: Ukuhlela isenzo sothando

Umqondo Omqoka

Injongo yesifundo lesi yikudala isikhathi sokuhlela isenzo sothando.

Impahla Yokusebenzisa

1. Amaphepha amakhulu awokunikeza abantu abahlanu kusiya kusikhombisa.

UMfanekiso wamadodana amabili

Bala uMathewu 21:28-32

- UBaba ucela amadodana akhe ukuthi enzeni? (*asebenze esivini*)
- Amadodana la omabili ayaluzwisisa na uthando lukayise? (*yebo*)
- Kulomahluko bani phakathi kwamadodana la omabili?
 - Indodana yakuqala yathi ayisoze ilalele uyise, kodwa yasala iguqula imqondo yalalela.
 - Indodana yesibi yathi izalalela kodwa kayizange.
- UJesu wadumisa yiphi indodana? (*Indodana eyalalelayo.*)

UJesu wayesebenzisa umfanekiso lo ukuthi atshengise ukungalaleli kwabakhokheli benkolo. Wathi abathelisi (izizebenzi zikaHulumende ezikhohlakeleyo) lezifebe ezaphendukayo zaqala ukulalela uNkulunkulu zizangena embusweni kaNkulunkulu ziqalela abakhokheli benkolo abathi bayamthanda uNkulunkulu kodwa bengalaleli.

Akwanelanga ukuthi sifunde njalo sizwe iqiniso likaNkulunkulu likhulunywa. Kathesi kumele sifake iqiniso likaNkulunkulu ezenzweni. UNkulunkulu ufuna uthando lwethu olulokulalela. Siyakwazi ukuthi uNkulunkulu usifiselani: ukuthi sithande uNkulunkulu njalo sithande omakhelwane bethu ngendlela esizithanda ngayo. Kumele siqale ukulalela intando kaNkulunkulu empilweni zethu ngokuthanda abanye okudlulela ezenzweni zothando.

Izigaba zethu lempilo zethu azisoze ziguquke size siqale ukwenza lokhu ebesikufunda. Asenzeni lokhu okulandelayo okuzasancedisa ukuthi senze lokhu akade sikufundiswa. Asenzeni umsebenzi ozasisiza ukuthi siqale ukwenza ke!

Amanyathelo okuhlela

INGXOXO YEQEMBU ELINCANE (5-7 ABANTU)

Iziqondiso Zoqondiso: Uma ufundisa ebandleni, kuyayenza ukuthi lokhu likwenze kuliqembu elikhulu. Hla iqembu likhangele inyathelo linye ngalinye.

Inyathelo 1: Umthandazo

Into yakuqala yokwenza yikuthandaza. Thatha isikhathi kathesi uthandaze. Cela uNkulunkulu akutshengise omele ukwenze esenzweni sakho sothando. Bona ukuthi uyathatha imizuzwana embalwa uthule ulalele uNkulunkulu.

Inyathelo 2: Ukukhetha umsebenzi wokwenza

Liyiqembu, khethani elingakwenza kube yisenzo sothando. Ukhona otshengiswe okukwenza nguNkulunkulu na? Uma omunye elemiqondo engenza isenzo sothando esihle, mceleni axoxele abanye. Kangelani njalo eminye imiqondo eliyilobe esifundweni sesihlanu: UNkulunkulu ufisa ibandla lincedisela lakusifundo sesithupha: ezinye izidingo esinganceda kuzo. Lindawonye vumelanani ukuthi lizwa uNkulunkulu eliholela ekuthini lenzeni.

Lingakhetha inhloko yendaba, libone ukuthi yinto elingayiyenza ngelanga elilodwa. Amanye amaqembu akhetha ukwenza okukhulu kakhulu. Qhubekelani phambili licabanga lize lithole elingakwenza ngosuku olulodwa, lisebenzisa impahla etholakala esigabeni, njalo lisebenzisa abantu abanengi elingabathola.

Uma lisenza lingamaqenjane amancane, uthi iqembu linye ngalinye litsho elikucabangileyo lizwe ukuthi abanye bathini ngakho.

- Sitshengisa uthando yini?
- Sincane njalo silula ukwenza yini?
- Singenziwa kusetshenziswa impahla ekhona yini?
- Siyavuma yini ukuthi kube labantu abanengi abaphathisayo?

Inyathelo 3: Yenzani uhlelo

Xoxani ngemibuzo elandelayo. Uma kusenza, omunye kabe eloba phansi impendulo ukuze lingakhohlwa.

- Yikuyini elizakwenza?
- Lidinga impahla zokusebenzisa ezinjani? Lizazithatha ngaphi? Ngubani ozakuyazithatha?
- Lincedisela ubani?
- Ngobani abazaphathisa ekuncediseni? Kubani ozanxusa abanye bonke?
- Lizakwenza nini lokhu, mhlakabani?

Iziqondiso Zoqondiso: Uma izifundi zisemaqenjane amancane, iqembu linye ngalinye kuzamele litsho elikuhlelileyo phambi kwabanye. Ube usubuza iqembu ukuthi linagbe liyabe lileminye imiqondo engaqinisa inhlelo eziyabe zikhulunywe.

Inyathelo lesine: Thandaza

Ungaqeda ukuloba uhlelo lwakho, thatha isikhathi sakho uthandaze njalo. Cela uNkulunkulu akuncedisela ukuthi uqedise lumsebenzi lokuthi andise impumela. Thandazela ukuthi ibizo lakhe lidunyiswe. Ngeviki elandelayo kumbe amaviki amabili alandelayo usalungiselela umsebenzi wakho, umele ubukhulekela ukuthi uNkulunkulu akuncedisela kulowo msebenzi.

Iziqondiso Zoqondiso: Chasisela iqembu ukuthi kulenyathelo ezimbili esingasozise sizenze namuhla. Ube usubala ingcazelo yenyathelo ezimbili eziseleyo.

Inyathelo 5: Yenza umsebenzi

Inyathelo elilandelayo ngelokwenza lokho okuhlelileyo. Qala ilanga lakho ngomthandazo unikele imizamo yakho kuNkulunkulu. Khumbula ukuthi umsebenzi lo uwenzela ukuthi utshengise uthando lukaNkulunkulu esigabeni senu. Zama ukuba esimeni esivumelana lalumqondo.

Inyathelo 6: Hlola lumsebenzi unikeze umbiko

Inyathelo lokucina ngelokuhlola lokubika. Kungani kumele sihlale? Ngoba kuyasinceda ukuthi sifunde. Singacabanga ngalokho esikwenze kuhle lalapho okumele sinyukise izinga ngesikhathi esizayo. Lokhu akumelanga kuthathe isikhathi eside, lingathatha imizuzu emilutshwane lixoxe ngemibuzo le elandelayo:

- Yikuyini okuhambe kuhle?

- Yikuyini okungahambanga kuhle?
- Ungalungisisa ngaphi ehlelweni lolu?
- Impumela le yiyo okade uyikhangelele na? Uma kungayisiyo, kungani ingasiyo?
- UNkulunkulu udunyisiwe na?

Isiphetho

Sesiqedile izifundo lezi ezogwalo lwakuqala.

INGXOXO YEQEMBU ELINCANE

Thatha isikhathi lixoxe emaqenjini amancane eminye imiqondo emqoka oyikhumbulayo kulemfundiso.

- Yikuyini ofisa ukukwenza ngendlela ehlukileyo ngeviki elizayo?

Sisiyaqeda, masikhumbuleni indatshana yamadodana amabili kuMathewu 21:28-31. Kulindatshana enye indodana yathi izalalela uyise kodwa ayizange. Enye indodana yesibili yathi ayisoze ilalele kodwa yalalela. UJesu wadumisa lo owalalelayo. Akwanelanga ukubuya sizofunda nje. Kumele senze esikufundayo. Izigaba zethu lempilo zethu azisoze ziguquke size senze lokhu ekade sikufunda. Ungaqala ngokuthanda abanye ekwedluleni esenzweni sothando esisodwa kumbe ezinengi.

Iziqondiso Zoqondisayo: *Thandazela iqembu ukuthi uNkulunkulu alisize ukuthi lenze lokhu ekade likufunda.*